

GŪUSG GASGĀ

MOONDA A ZEOVA RĪUNGĀ



BŌE YĪNG TU D SEGD N PŪUSE?

GŪUSG GASGĀ yaa sebr sēn waoogd Wēnnaam a Zeova sēn yaa āndūniyā fāa Naabā. A leb n kengda nebā pelse, bala a wilgdamē tu ka la bilfu, Wēnnaam Rūngā sēn be saasē wā na n kutame tu wēnem buud fāa sa, la a kut tu tēngā lebg arzāna. A sagenda nebā tu b tē a Zezi Kiristi, bala yē n sak n ki sēn na yūl tu tōnd tōog n paam vūum sēn ka satā, leb n yaa yē la Wēnnaam Rūngā Rīma. Yaa hal sēn sung ne yoomd 1879 wā la a Zeova Kaset rāmbā yiisd seb-kāngā. Sebrā pa teend politik sull baa a yemb̄ ye. A goamā fāa tika Biiblā zugū.

Y sā n dat kibay n paase, bū y sā n dat tu b wat n zāmsd yāmb Biiblā,

bū y ges www.jw.org
Y leb n tōe n golsa a Zeova Kaset rāmbā ne aders nins sēn be tēngrā a yembre.

SOUTH AFRICA:
Jehovah's Witnesses
Private Bag X2067,
Krugersdorp, 1740

BÉNIN:
Les Témoins de Jéhovah
B.P. 312
AB-Calavi

Sēn na yul n bāng b aders rāmbā fāa, bū y ges www.jw.org/contact.

Seb-kāngā pa koosd ye. B yiis-a lame n na n sōng nebā dūniyā gill zug tu b zāms Biiblā. Yaa ligdā nebā sēn kōt ne yamleoogā n teend toomdā. Biiblā verse rāmbā yita Wēnnaam Sebrā pogē, la d remb-b lame tu, zems ne moorā gōlsgā noyā. Verse sā n pogl ne MN, wilgdamē t'a yita Les Saintes Écritures—Traduction du monde nouveau wā pogē.

The Watchtower (ISSN 0043-1087) is published semimonthly by Watchtower Bible and Tract Society of New York, Inc.; L. Weaver, Jr., President; G. F. Simonis, Secretary-Treasurer; 25 Columbia Heights, Brooklyn, NY 11201-2483, and by Watch Tower Bible and Tract Society of Canada, PO Box 4100, Georgetown, ON L7G 4Y4. Periodicals Postage Paid at Brooklyn, NY, and at additional mailing offices. POSTMASTER: Send address changes to Watchtower, 1000 Red Mills Road, Wallkill, NY 12589-3299. © 2014 Watch Tower Bible and Tract Society of Pennsylvania. Printed in Nigeria.

ZĀMSGĀ SŌSSĀ

SIGRI, A 2-8 | SEB-NENG A 7 · YULLA: 33, 133

Ruk-y-yā a Moiiz togs-n-taare, n tall tēebo

SIGRI, A 9-15 | SEB-NENG 12 · YULLA: 81, 132

Yāmb nee “nebā nin sēn ka tōe n yā a soabā” bū?

A Moiiz tēebā kutame t'a ra pa get būmb nins nin sēn ne wā bal ye. Sōs-kāngā na n wilga d sēn tōe n duk a Moiiz togs-n-taar to-to, n tall tēeb wa d ne “nebā nin sēn ka tōe n yā a soabā.”—Heb. 11:27.

SIGRI, 16-22 | SEB-NENG 17 · YULLA: 62, 106

Ned ka be n tōe n sak zu-soben-dāmb a yiib ye

SIGRI, 23-29 | SEB-NENG 22 · YULLA: 22, 95

Tall-y raoodo, bala, a Zeova yaa yāmb sōangda!

Dūniyā gill zugū, neb milyō-rāmb n yik n kēng tēn-zēms n na n tu bao ligdi. Wosg loogdame n bas b pagb wall b sūdba, la b kamba. La wān to la a Zeova rat tu d ges d zakā rāmb yelle? Wān to la a sōngd tōnd zī-kāng weengē? Sōs-kāensā na n leoka sogs-kāense.

SIGRI, 30-SĒOOGO, A 6 | SEB-NENG 27 · YULLA: 69, 120

Yāmb sūur nooma ne a Zeova sēn get tōndā bū?

Biiblā yeelame t'a Zeova “nee zīgā fāa.” (Yel. 15:3) Neb kēer sā n karem gom-kāensā, b yeesdame, n tagsdē t'a gūusdame n dat tu d sā n kūls a noyā bū a subg-do. La sōs-kāngā na n wilga būmb a 5 sēn wilgd t'a Zeova sēn get tōndā yaa a sēn nong-dā yīnga, la rē sēn nafd tōnd to-to.

SĒN BE SEBRĀ PUGĒ ME

Bōe yīng tu nebā puusdē? 3

Bōe yīng tu d segd n puuse? 4

Sogsg Biiblā sēn leokde 32

Bōe yīng tu nebā puusdē?

Yāmb nonga puusg bū? Neb wusg puusdame. Baa neb sēn pa tēed Wēnde. La bōe yīng tu nebā puusdē? Vaeesg b sēn maan Fārens soolmē wā wilgame tu b nin-buiidā puu-suk puusdame wall b mi n tagsd Wēnnaam yelle, la yaa “sēn na yūl tu b yam gāand bāan” bala. Wala Erop soolmā neb wusgo, Fārens nin-buiidā kēer sēn puusdā pa sēn na yūl n pēg Wēnnaam ye. Tēns a taab pusē me, sānda sēn yet tu b tēeda Wēnnaam puusd-a-la b sā n wa tar zu-loees bala, n dat sōngr tao-tao.—Ezai 26:16.

La yāmb yē? Rē yīnga y tagsdame tu puusgā yōod yaa sōng-d tu d yam gāand bāan bū? Yāmb sā n tēeda Wēnnaam, rē yīnga y neeme tu y sēn puusdā nafd-y lame bū? Bū wōnda Wēnnaam pa reegd y puusgo? Biiblā tōe n sōng-y lame tu y bāng tu puusgā yōod pa sōng ned t'a yam gāand bāan ye. Yaa sēn na yūl t'a paam Wēnnaam zoodo.



Bōe yīng tu d segd n puuse?

Tōe tu y zoe n soka y meng woto: 'Wēnnaam sā n mii būmba fāa, hal baa mam tagsa wā menga, bōe yīng tu m segd n puusdē?' Sokrā zemsame. Sūd me, a Zezi ra yeelame tu Wēnnaam 'mii tōnd sēn datā tu tōnd nan ka kos' ye. (Matue 6:8) A Daviud sēn yu Israyell rīmā me yeela woto: "Goam sēn nan ka ta mam zilemdē, Zu-soaba, gese, yāmb deng n bāng-a-la zāngā." (Yūl Sōamyā 139:4) Sēn yaa woto wā, bōe yīng masā tu d segd n puusd Wēnnaam? Nand tu d leoke, bu d ges Biiblā sēn yet būmb ning puusgā weengē.*

PUUSG SÖNGDAME TU D PAAM WĒNNAAM ZOODO

Baa Biiblā sēn yeel tu Wēnnaam a Zeova[#] mii

* Tōnd sā n dat tu Wēnnaam kelg-do, d segd n puusd-a-la wa a sēn datā. Rē, wa d sēn na n yā sōs-kāngā pugē wā, d na n bānga puusgā sēn tōe n söng-d to-to. Y sā n dat kibay n paas bu y karem Biiblā sid yetame tu bōe? sebrā sak 17. A Zeova Kaset rāmbā n yiis-a. Wall y kē tōnd sitā pugē www.jw.org.

Biiblā wilgdamē tu Wēnnaam tara yutre. A yuvarā la a Zeova.

"Bu y kolg Wēnnaam,
la bāmb na kolg yāmba."

—Zak 4:8

būmb fāa wā, a yetame me t'a pa kelgd neb nins sēn tūud-a wā puusg a we n kelg bal ye. (Yūl Sōamyā 139:6; Rom dāmba 11:33) Wēnnaam pu-tēerā sēn ka koakā pa wa ordinateer sēn pa tar yīn-sidga, n bīngd kibay toor-toorā ye. Sūd me, tōnd ned kam fāa sēn tagsd būmb ning a sūur pugē wā tara yōod ne Wēnnaam, bala, a ratame tu d paam a zoodo. (Yūl Sōamyā 139:23, 24; Zak 4:8) Rē n so t'a Zezi sagl a karen-biisā tu b puusd a Ba a Wēnnaam, baa a sēn zoe n mi b raabā. (Matue 6:6-8) D sā n pelgd d pug n wilgd d Naandā sēn be d sūrē, paasda tōnd ne a zoodā pāngā.

Sasa ninga, tōe n yaa toog tu d bāng d sēn na n puus Wēnnaam n kos būmb ning takū. La sā n wa yaa woto, Wēnnaam tōe n bānga tōnd sēn dat a soab n makd togsg n pa tōeyā, n kō-do. (Rom dāmba 8:26, 27; Efēez rāmba 3:20) D sā n miē tu Wēnnaam leoka d puusgo, baa a sēn leokd to-to wā pa vēnega, paasda tōnd ne a zoodā pāngā.

WĒNNAAM LEOKDA PUUSG BUUD FĀA BL?

Biiblā yet-d-la vēeneg tu Sēn-tōe-a-fāa wā leokda a nin-buiidā puusgo, la a wilgd būmb ning sēn kūt t'a pa kelgd puusg kērā. Wala makre, pīnd wēndē, wēnemā sēn wa n piuug Israyellā, Wēnnaam kūtame tu no-rees a Ezai yeel a nin-buiidā woto: "Baa yāmb sēn paasd puusgā, mam ka kelgd ye. Yāmb nus pida ne zūm." (Ezai 1:15) Woto wilgda vēeneg tu ned sā n puusdē la a pa tūud Wēnnaam noyā, wall a kot būmb sēn pa zemse, Wēnnaam pa reegd ye. —Yelbūna 28:9; Zak 4:3.

Sēn paase, Biiblā yeela woto: "Tōnd sā n kos būmb sēn zems bāmb daabo, b kelgda tōndo." (1 Zā 5:14) Rē yīnga woto rat n yeelame tu Wēnnaam leokda a nin-buiidā kosg fāa bu? Ayo. Tūm-tūmd a Poll makrā wilgda rē. A puusa Wēnnaam hal naoor a tāab n kos-a t'a yāk



“Tōnd tara tēeb kāng ne bāmb tu tōnd sā n kos
būmb sēn zems bāmb daabo, b kelgda tōndo.”—1 Zā 5:14

a “yīng gōaag” n yols-a. (2 Korēnt dāmba 12: 7, 8) Wōnda a Poll nin n da zabd tu namsd-a. Ad woto sūd ra segd n sāamda a sūur wusgo! Bala, baa Wēnnaam sēn da kō-a tōog t'a maag bāas la a vuug kūum mengā, a ra segd n kell n tōoga toog a bāagā pugē. (Tuuma 19:11, 12; 20: 9, 10) Wēnnaam pa maag a Poll bāagā ye. La a sūur yū noog ne Wēnnaam sēn leok-a to-to wā.—2 Korēnt dāmba 12:9, 10.

Yaa sūd tu Biiblā pugē, Wēnnaam leoka neb kēer puusgo ne yel-soalmā. (2 Rīm dāmba 20:1-7) La woto ra pa wae ye. Wēnnaam nebā kēer da wa n tagsame t'a pa leokd b puusgo, tu b sūy sāamame. Makre, rīm a Davud da soka woto: “Zu-soaba, yāmb na n yīma mam yell hal tu ta dabure, hal tu ta wakat sēeb bū?” (Yūl Sōamyā 13:2) La a Davud sēn da tēed a Zeova ne a sūur fāa wā wa n bāngame t'a Zeova sōng-a-la naoor wusgo, tu kit t'a maneg n kis-a suda. Ad a sēn paase: “Maam, mam na n della yāmb nonglmā.” (Yūl Sōamyā 13:6) Wa a Davude, rūndā-rūndā me, Wēnnaam nin-buiidā segd n ket n wungda ne puusgo, n gūud wakat ning a sēn na n leok-ba.—Rom dāmba 12:12.

WĒNNAAM SĒN LEOKD PUUSG TO-TO

Wēnnaam kōt-d-la sēn yaa tulae ne-do.

Pa wakat fāa la roagd sēn nong a biig sakd n kō-a būmb ning a sēn kos-a, la wakat ning biigā sēn datā ye. Woto me, Wēnnaam tōeeme n pa leok tōnd puusg wa d sēn da tēede, bū wakat ning d sēn da ratā ye. La d tōe n basa d yam tu būmb sā n yaa tulae ne-do, d Naandā sēn yaa d Ba sēn nong-dā na n kō-d la rē wakat ning sēn zemse.—Luk 11:11-13.

Wēnnaam tōe n leoka d puusg tu d pa bāng ye.

La sā n yaa zu-loeeg n namsd tōnd tu d puusd n dat sōngr yē? Rē yīnga d sā n paama d yellā tum tu pa tū ne yel-solemde, d segd n yeelame

t'a Zeova pa leok bū? Ayo. Sēn sāo yaa d sēn na n gūus n ges sā n pa Wēnnaam n leok tu d pa miē. Tōe tu d sēn wa n dat sōngrā, d zoa hakuk ning n sōng-do. (Yelbūna 17:17) La tōe n yaa a Zeova n tūnug ne-a n sōng-do. Wakat ning me, Wēnnaam tōe n tūnuga ne Biiblā n leok d puusgo. Bala d tōe n paama sagls a pugē wā n mao ne zu-loeeg—a.—2 Tūmote 3:16, 17.

Naoor wusgo, Wēnnaam kōta a nin-buiidā pāng tu b tōogd n maood ne b zu-loees kēere, la a pa kītd tu b paam b mens fasū ye. (2 Korēnt dāmba 4:7) Wala makre, a Zezi sēn da wa n yēesdē tu b sēn na n kū-a to-to wā na n sāama a Ba a Wēnnaam yūrā, a puusame n kos sōngre, t'a Zeova tūm malek t'a wa keng a raoodo. (Luk 22:42, 43) Woto me, yell ning sā n wa pakdo, Wēnnaam tōe n tūnuga ne d zoa hakuk n keng d raoodo. (Yelbūna 12:25) D sēn tōe n pa bāng tu sōngr a woto yita Wēnnaam nengē wā, segdame tu d gūusd n get a sēn leokd d puusg fāa to-to wā.

Wēnnaam leokda puusg kēer wakat ning sēn zemse.

Biiblā yeelame tu Sēn-tōe-a-fāa wā sōngda sik-m-mens rāmbā a ‘wakate.’ (1 Pīter 5:6) Woto yīnga, d sā n pelg d pug n puus a Zeova tu wōnd a kaoosdame n pa leokdē, bū d ra tags t'a pa nong-d ye. D Naandā yam la a bāngr sēn yūd tōnd hal zīg sēn zārā, a mii a sēn na n leok tōnd wakat ning tu zemse.

D ruk makre. Mams-y wa yāmb sēn na n yaa roagda, tu y bi-bilf kos-y montēere. Rē yīnga y na yū yāg-yāg n kō-a montēerā sūda? Sā n mik t'a paooda ne montēere, tōe tu y na n basame tu yū bilfu, t'a sā n wa tōe n zomb bū y yaool n da n kō-a. Woto me, d sā n kot Wēnnaam būmb d sēn dat ne d sūur fāa, a wat n leok-d-la wakat ning sēn zemse.—Yūl Sōamyā 37:4.

“Bu y sik yāmb mens Wēnnaam sēn
yaa pāng soabā taoore, tu wakat
sā n ta, bāmb na zēk yāmba.”

—1 Pūeer 5:6

BAS-Y Y YAM T'A ZEOVA KELGDAME

Biiblā sagenda kiris-nebā tu b ra tol n yīm pūusgā yōod ye. La tōe tu kēer na n leokame tu ‘woto yeelg yaa nana, la a tūub yaa toogo.’ Yaa sūd tu d sā n maooda ne zu-loe-kegeng hal sēn kaoose, wall b sā n maan-d-la pāng tu d pūusd n kot Wēnnaam sōngre, tōe n yū toog tu d maag d meng n gū t'a leoke. Sā n yaa rē, yuta sōma tu d tēeg būmb a Zezi sēn yeel pūusgā weengē.

A ruka makr n gom pug-kōor sēn da kēnd bu-kaood sēn pa turg nengē n kot-a sōngre. (Luk 18: 1-3) Baa bu-kaoodā sēn da tōdg t'a pa na n sōng-a wā, a wa n baas n yeela woto: “Pug-kō-kāngā sēn pēgd maamā, mam na n sōng-a lame t'a ra wat daar fāa n namsd maam ye.” (Luk 18:4, 5) Gom-bil ning b sēn lebg tu ‘namsd maamā’ vōorā meng-meng yaa “ra wa sāam m yvur ye.”* Bu-kaoodā sēn pa turgā sā n zoeya b na n wa sāam a yvur n sak n sōng pug-kōorā, sēn yūda, Wēnnaam sēn dat tōnd neerā kōn sōng neb nins sēn ‘zēkd b koees n kot bāmb wīntoog ne yungā’ suda? Wa a Zezi sēn yeelā, Wēnnaam “na n sōnga bāmb tao-tao.”—Luk 18:6-8.


Yaa sūd tu d sā n kot būmb n pa paamdē, d tōe n wa yaa ne kosgo, la d pa segd n kom sraood ye. La d sa n wīngd ne pūusgo, d wilgdame tu d rata ne d sūur fāa tu Wēnnaam sōng-do. Sēn paase, d bāngda Wēnnaam sēn leokd d pūusgā to-to, tu paasd tōnd ne a zoodā pānga. Hakuka, d tōe n basa d yam tu d sā n pūusd a Zeova ne tēeb wa a sēn datā, a na n deegame.—Luk 11:9. ■

* Pind wēndē, Wēnnaam da yeela Israyell bu-kaoodbā tu b gūus n da wēg pug-kōor wall kūb būvd sasa ye.—Tōodo 1:16, 17; 24:17; Yuul Sōamya 68:6.

“Bu y kos tu b na kō-yā.”
—Luk 11:9



Wēnnaam tōe n tūnuga ne Biiblā n leok d pūusgo



Wēnnaam tōe n tūnuga ne d zoa hakuk n sōng-do, d sēn wat n dat sōngre



Ruk-y-yā a Moiiz togs-n-taare, n tall tēebo

"Ne tēebo, a Moiiz sēn wa n bi, yē ka sak
tu b bool yēnda tu Faraō bi-pugl biig ye." –HEB. 11:24.

A MOIZ ra miime t'a tōe n paama būmb wusg Ezipt soolmē wā. A ra nee arzegsā rāmb sēn me ro-bēdā. A ra yaa naabā zak neda. B zāms-a-la "Ezipt dāmbā Yam fāa," wala makre, nug tuvuma, geela, la siānsā. (Tuv. 7:22) A Moiiz ra tōe n paama arzēka, naam la ziiri, n paas būmb a taab Ezipt nebā wusg sēn da pa tōe n paame.

2 La a Moiiz sēn wa n ta yuum 40, a yāka Yam n maan būmbu, tu ling a Faraō ne a zakā rāmba. A basa būmb nins a sēn da tōe n paam Eziptā. La pa sēn na n vuimd wa Ezipt nin-talsā sēn da vu to-to wā ye. A yāka Yam n na n naag yembse. Bōe yīnga? A Moiiz ra tara tēebo. (**Karm-y Hebre dāmb 11:24-26.**) A tēebā kūtame t'a ra pa get būmb nins nin sēn ne wā bal ye. A ra ne a Zeova, "nebā nin sēn ka tōe n yā a soabā," n da kūs sūd t'a na n pidsa a pūlemsā.—Heb. 11:27.

3 Tōnd me pa segd n ges būmb nins nin sēn ne wā bal ye. D segd n talla tēebo. (Heb. 10:38, 39) Rē n so tu d na n gom Hebre dāmb 11:24-26 sēn yeel būmb ning a Moiiz zugā yelle. Rē na n sōng-d lame tu d tēebā pāng paase. Sōs-kāngā na n leoka sogskāensā: Wān to la a Moiiz tēebā sōng-a tu yīngā ratem-wēngā

1, 2. a) A Moiiz sēn wa n ta yuum 40, a yāka Yam n maan bōe? (Ges-y fotā sēn be yīngā.) **b)** Bōe yīng t'a yāk Yam n na n naag Wēnnāam nin-buiidā n namse?

3. Sōs-kāngā na n leoka sogskāensā?

YAM BUG LA D TŌE N DLK A MOIZ KIBARĀ PUGĒ?

Welg-bug n be bao būmb nins sēn pa kaoosdā ne bao būmb nins sēn paad wakat fāa wā suka?

Wān to la a Zeova sōngd tōnd tu d tumd tuum nins a sēn kōt-dā?

Bōe yīng tu d segd n get d keorā sēn be taoorā?

yamleoog pa kē-a? Wān to la a tēebā sōng-a t'a kell n tūm tūvūd ning a Zeova sēn kō-a wā, baa neb a taab sēn wa n paoogd-a wā? Bōe yīng t'a Moiiz ra get keoor ning sēn be a taoorā?

A PA BAS TL YĪNGĀ RATEM-WĒNGĀ YAMLEOOG KĒ-A YE

4 A Moiiz sēn da tar tēebā kutame t'a bāng tu 'sū-noog ning yel-wēnā sēn kōtā' pa kaoosd ye. Tōe tu wusg ra pa tagsd woto ye. Bōe yīnga? B ra nee Ezipt nebā sēn puusd bōn-naands la b maand zīndāmb yelā. Baa ne rē, bāmb n da yaa dūni gill pān-soaada, tu Israyell nebā yaa yembs n namsdē. La a Moiiz ra miime tu Wēnnaam tōe n toeema yelā. Baa sēn da wōnd neb nins sēn sakd b mens ratem-wēngā vūm yaa noogā, a Moiiz ra kīsa sūd tu nin-wēnsā na n sāamame. Woto kutame tu "sū-noog ning yel-wēnā sēn kōt wakat bilf pugē wā" yamleoog ra pa tar-a ye.

5 Bōe la y tōe n maan tu "sū-noog ning yel-wēnā sēn kōt wakat bilf pugē wā" yamleoog ra kē-yā? Y pa segd n yīm tu sū-no-kāng pa kaoosd ye. Y sā n tar tēebo, na n sōng-y lame tu y bāng tu "dūniyā ne a ratem wēngā me loogdame." (1 Zā 2:15-17) Ra yīm-y būmb ning sēn na n paam sēn maand-b yel-wēnā n pa tekđē wā ye. Nin-kāensā bee "zī-saals pusē." B na n "menemame n se ne yēesgo." (Yul 73:18, 19) Y Yam sā n wa be būmb sēn pa zems maanego, sok-y y meng woto: 'M datame tu m vūmā yū wān beoogo?'

6 A Moiiz tēebā sōng-a lame t'a pa sak n tūm Ezipt na-yirā ye. "Ne tēebo, a Moiiz sēn wa n bu, yē ka sak tu b bool yēnda tu

4. Bōe la a Moiiz ra mi 'sū-noog ning yel-wēnā sēn kōtā' wēengē?

5. Bōe la y tōe n maan tu "sū-noog ning yel-wēnā sēn kōt wakat bilf pugē wā" yamleoog ra kē-yā?

6. a) Bōe yīng t'a Moiiz 'pa sak tu b bool-a tu Faraō bi-pugl biiga'? b) Bōe yīng tu y tōe n yeel t'a Moiiz yam-yākrā yū sōma?

Faraō bi-pugl biig ye." (Heb. 11:24) A pa tags t'a tōe n paa rīmā zakē n paam arzek la naam, n tōog n maan Wēnnaam daabā la a sōng Israyell nebā sēn yaa a saam-biisā ye. A ra nonga Wēnnaam, n dat n maan a raabā ne a sūur fāa, ne a yam fāa, la ne a pāng fāa. (Tōo. 6:5) A Moiiz yam-yākrā kutame t'a gil sū-sāamse. Ezipt arzeegs nins a sēn bas n pa baoā wusg wa n lebga Israyell nebā soolem. (Yik. 12:35, 36) A Zeova wa n ninga a Faraō yānde, la a ku-a. (Yul 136:15) La a Moiiz yē? Wēnnaam kutame t'a lūi Israyell buudā neb taoore, n tall-b n yi Ezipti. A vūmā talla barka.

7 Yāmb sā n yaa a Zeova Kaset soab n yaa bi-būga, wān to la y tēebā tōe n sōng-y tūmā baoob wēengē? Yita sōma tu y tags beoog-darā yelle. Y sā n tēed Wēnnaam pulemsā, y na n yāka yam n bas būmb nins sēn pa kaoosdā, la y bao būmb nins sēn paad wakat fāa wā. (**Karm-y Matue 6:19-21.**) Pug-sad yuur sēn boond t'a Sophie maana woto. A ra mi saoog sōma, tu saoog sul yūy sēn yi Etazīni ra rat n yao t'a karme, la a sak n naag bāmb n saoodē. A yeela woto: "Nebā sēn da kilsd maamā ra noom-m-la wusgo. Mam da tagsdame meng tu m mii saoog n yūd m taabā. La m da pa tar sū-noog ye." A Sophie wa n gesa filim *Les jeunes s'interrogent... Que vais-je faire de ma vie ?* Rē poore, a bāngame tu yē sēn baood dūniyā arzekā n paas sēn nong-b saoogā pēgrā kutame t'a pa le tūud a Zeova ne a sūurā fāa ye. Rē n so t'a pelg a pug n puus a Zeova, la a bas saoogā. Rūndā-rūndā, a tagsg yaa wāna? Ad a sēn yeele: "M pa tagsd tu m bōna būmb ye. Masā, m tara sū-noog hakuka. Maam ne m sūdā yaa so-pakdba. Yaa sūd tu d yūy pa yi, d pa arzeegs rāmb me ye. La d

7. a) Sā n yaa ne Matue 6:19-21, bōe yīng tu d segd n bao būmb nins sēn paad wakat fāa wā? b) Welg-bug n be bao būmb nins sēn pa kaoosdā ne bao būmb nins sēn paad wakat fāa wā suka? Rūk-y makre.

tara a Zeova zoodo, n tar Biibl karen-biisi, la būmb wusg d sēn tōe n maan a Zeova tuvmdā pugē. M pa maand m bāngē baa bilf ye.”

8 A Zeova mii būmb nins sēn yaa sōma ne yāmba. A Moiiz yeela woto: “Zu-soab a Wēnnaam datame tu y zoe bāmba, la y tū bāmb sore, la y nong bāmba n sak bāmb ne y sūyā fāa la ne y yam fāa, la y sak bāmb noorā ne b tōod nins mam sēn kō yāmb dūndā wā n paam sū-noogo.” (Tōo. 10:12, 13) Yāmb sā n ket n yaa bi-būga, tags-y n ges-y y sēn tōe n bao tuvmd ninga, tu sōng-y tu y kell n nong a Zeova la y maan a raabā ‘ne y sūurā fāa la ne y yam fāa.’ Y tōe n kīsa sūd tu y sā n maan woto, y na n ‘paama sū-noogo.’

A RA GETAME TL TUUMD NING A ZEOVA SĒN KŌ-A WĀ TARA YŌODO

9 A Moiiz ra kīsa sūd tu yē sā n yu Kirist n paam paoogr n sāo Ezipt arzegsā. (Heb. 11:26, MN) Verse kāngā pugē b boola a Moiiz tu “Kirist” bu “b sēn yāk a soabā.” Woto rat n yeelame tā Zeova yāk-a lame tā na n lū Israyell nebā taoor tu b yi Ezipti. A Moiiz ra miime tu pa na n yu nana ye. B ra na n paoog-a lame menga. Israyell ned n da zoe n paoog-a, n sok-a woto: “Ānda n kō foo noor tu f soog tōnd la f yu tōnd bu-kaooda?” (Yik. 2:13, 14) A Moiiz meng wa n soka a Zeova yaa: “Faraō na n maana wān n kelg maam?” (Yik. 6:12) A togsa a Zeova būmb nins a sēn da yeesdā, la sēn da pak-a wā. Rē sōng-a lame tā segl a meng tu nebā paoogrā pa kombs a raood ye. La wān to la a Zeova sōng a Moiiz tā tōog n tum a tuvmdā?

10 Pipi, a Zeova pulma a Moiiz woto: “Mam na n zīnda ne foom.” (Yik. 3:12)

8. Biiblā sagl-bug n tōe n sōng bi-bug tuvmaā baob weengē?

9. Bōe yīng tu ra tōe n yu toog ne a Moiiz tā tum tuvmd ning Wēnnaam sēn kō-a wā?

10. Wān to la a Zeova sōng a Moiiz tā tōog n tum a tuvmdā?

Yiib-n-soaba, a wilga a Moiiz a yūvrā vōor tu keng a raoodo. A yeelame: “Mam na n yu mam sēn dat n yu a soaba.”* (Yik. 3:14, MN) Tāab-n-soaba, a kō a Moiiz tōog tā tōe n maan yel-soalma, tu wilgdē tu sūd yaa yē n tuvma. (Yik. 4:2-5) Naas-n-soaba, a Zeova yāka a Aarō tā na n yu a Moiiz koe-taasda, n sōng-a. (Yik. 4:14-16) A Moiiz sēn wa n kolg kūumā tā ra kīsa sūd zāng tu Wēnnaam sā n kō ned tuvmd, a sōngd-a lame tā tōoge. Rē n so tā yeel a Zozue sēn da na n ledg-a wā woto: “Yaa Zu-soabā n na n lū fo taoore. Bāmb bee ne foom. Bāmb sōngrā ka na n vaal ye. Bāmb ka na n bas foom ye. Ra zoe rabeem ye, la ra sak tu f peleng yūk ye.”—Tōo. 31:8.

11 Ne a Zeova sōngre, a Moiiz tōog n tuvma tuvmd-kāseng ning a sēn kō-a wā, hal n da getē tā tara yōod n “yuūd Ezipt arzegsā.” Sūd me, būmb kae tā yōodā ta f sēn na n tuvma Wēnnaam sēn tōe fāa wā tuvmd ye. Yu Ezipt na-yirā biigā pa tōe n dūk n mak ne yu ned ning a Zeova sēn yāk tā lū Israyell nebā taoorā ye. A Moiiz sēn sak n maan a Zeova raabā, a paama bark wusgo. A paama a Zeova zoodo, tā sōng-a tā “maan tuvmd-kāsems” n tall Israyell nebā n ta kāabg tēngā noore.—Tōo. 34:10-12.

12 A Zeova kōo tōnd me tuvmd. A kūtame tā Bi-riblā kēes tōnd yē tuvmdā sēn yaa koe-noogā moonegā pugē, wa a sēn maan to-to ne tuvmd-tum a Poll la neb a taabā. (**Karm-y 1 Tumote 1:12-14.**) Yaa tōnd ned kam fāa la a kō tuvmd-kānga. (Mat. 24:14; 28:19, 20) Kēer yaa so-pakdba. Saam-biis sēn tar minim n

* Biibl-mit a yembr wilga Yikr 3:14 goamā vōore, n yeel tu būmb kae n tōe n gudg a Zeova tā pa pids a raabā ye. A paasame tu “yu-kāng [Zeova wā] ra segd n yu Israyell nebā pāng zīiga.” B sēn da mi yūvrā vōorā ra belsd-b lame, la kūt tu b saagdē tu beoog na n yu neere.

11. Bōe yīng tā Moiiz ra getē tu tuvmd ning Wēnnaam sēn kō-a wā tara yōod wusgo?

12. Tuvmd-bus la a Zeova kōt tōndo?

yaa kāsem-sōngdb wall kāsem-dāmba, n sōngd b tēed-n-taasā. La yāmb zakā neb nins sēn pa a Zeova Kaset rāmbā, n paas neb a taab tōeeme n pa nand tuum nins y sēn tuumdā ye. Tōe meng tu b yaand yāmb y sēn mongd y mens būmb wusg rē yīngā. (Mat. 10:34-37) B sā n tōog n koms y raodo, y tōe n wa tagsdame tu y sēn mongd y meng woto wā pa tar yōodo, wall y tagsdē tu y pa tōe n tuum a Zeova tuumdā sōma ye. Sā n wa yaa woto, wān to la tēebā na n sōng-y tu y kell n tuum tuumdā?

Paam n sōs ne a Moiiz wall
wēn-sakdb a taab na n talla yamleoogo
(Ges-y sull 16)



¹³ Kos-y-yā a Zeova sōngre, la y tē t'a sud na n sōng-y lame. Togs-y-yā-a būmb nins sēn yeesd-y-yā, la sēn pak-y-yā. Sēn mik tu yaa a Zeova n kō-y tuumdā, a na n sōng-y lame tu y tōoge. Wān to? A na n sōng-y-la wa a sēn sōng a Moiizā. Pipi, a Zeova pūlma woto: "Mam na n kenga yāmba, mam na n sōnga yāmba. Mam na n talla yāmb ne m nug-rutg sēn tōogdā." (Ezai 41:10) Yiib-n-soaba, a wilgame tu y tōe n kusa sud t'a pidsda a pulemsā, n yeele: "Mam goamā na n pidame. Mam yam-yākrā na n tōogame." (Ezai 46:11) Tāab-n-soaba, a na n kōo yāmb 'pānkāsenga', tu y tōog y tuumdā. (2 Kor. 4:7) Naas-n-soaba, sēn na yul tu y kell n tuum y tuumdā, d saasē Ba wā kutame tu y tar tēed-n-taas dūniyā gill zugu, n tōe n paam sagls la sōngr b nengē. (1 Tes. 5:11) Y sā n ne a Zeova sēn sōngd-y tu y tuum a tuumdā, y tēebā pāng na n paasdame, tu y maneg n kūs sud tu tuum nins a sēn kōt-yā yōod yūda arzēk buud fāa y sēn tōe n paam dūniyā pugē.

A MOIIZ RA “GETA KEOOR SĒN BE TAOORE”

¹⁴ A Moiiz ra “geta keoor sēn be taoore.” (Heb. 11:26) Yaa sud t'a ra pa mi būmb nins Wēnnaam sēn na n maan beoog-daarā wusg ye. La bilf ning a sēn da mi wā sōng-a-la a yam-yākr fāa pugē. Wa a yaab a Abrahaam, a Moiiz ra kusa sud t'a Zeova tōe n vuuga kūum. (Luk 20:37, 38; Heb. 11:17-19) A sēn da tēed Wēnnaam pulemsā kutame t'a pa ges vuum 40 a sēn zīnd Madiā wā, n paas vuum 40 a sēn zīnd rasempvuugē wā wa bōn ye. Baa a sēn da pa mi a Zeova pulemsā fāa sēn na n pids to-to wā takū wā, a tēebā ra tara pānga, tu yaa wa a nee keoorā sēn be taoorā.

13. Wān to la a Zeova sōngd tōnd tu d tuum nins a sēn kōt-dā?

14. Bōe n kūt t'a Moiiz ra kūs sud t'a na n paama keoore?

15 Yāmb 'geta y keoorā sēn be taoorā' bu? Wa a Moiizi, tōnd me pa mi Wēnnaam pulemsā sēn na n pids to-to wā takū ye. Wala makre, d pa mi to-kāsengā sēn na n sūng 'wakat ningā' ye. (Mark 13:32, 33) La d sēn mi būmb ning arzānā zugā yūda a Moiizi. A Zeova sēn wilg tōnd vuumā sēn na n yū to-to a Rīungā naam duub sasa wā, kutame tu d tōe n mams dūni-paalgā sēn na n yū to-to wā d yamē. Dūni-paalgā sā n yaa vēeneg d yamē, d na n deng n baoa Wēnnaam Rīungā. D ruk makre: Ned sā n dat n koos roog ne yāmb tu y yaool n zu n yā roogā, y na sak n da sida? Sāmbg kae tu y pa na n da ye. Woto me, y sā n dat n wa kē dūni-paalgā pugē n yaool n pa kūs sūd tu dūni-paalg n wate, y pa na n sak n modg wusg n bao rē ye. D tēebā sā n tar pānga, vuumā sēn na n yū to-to Rīungā naamā duub sasa wā na n yū vēeneg d yamē.

16 Y sā n dat tu Wēnnaam Rīungā yū vēeneg y yamē, bu y tagsd yāmb vuumā sēn na n yū to-to arzānā pugē. Wala makre, y sā n wa karemd Biiblā kibay sēn gomd neb sēn vuumā sēn deng a Zezi rogmā yelle, bu y tags sogsg nins y sēn tōe n sok-b vuugrā poore. Tags-y sogsg nins bāmb me sēn tōe n sok yāmb yaolem wakatā zugu. Mams-y y sūur sēn na n yū noog to-to, y yaab-rāmbā sā n wa vuuge, tu y wilgd-b būmb nins Wēnnaam sēn maan bāmb yīnga. Y leb n na n tōog n bānga we-rūms wusgo, tu b vu ne taab ne bāane. Mams-y b gesg sēn na n zīnd yamleoog to-to wā. Mams-y yāmb ne a Zeova zoodā sēn na yū to-to, y sā n wa zems zāngā.

17 Keoor ning sēn be taoorā sā n yaa vēeneg d yamē, na n sōng-d lame tu d kell n maan Wēnnaam daabā ne sū-noogo. D

15, 16. a) Bōe yīng tu d segd n get d keoorā sēn be taoorā? b) Wēnnaam Rīungā naam sēn na n wa ne bōn-sōma ninsā suka, bvg n noom yāmb n yūda?


17. Keoor ning sēn be taoorā sā n yaa vēeneg d yamē, wān to la na n sōng tōndo?

yam-yākr fāa me na n wilgame tu d rat n vuumda wakat sēn kōn sa. Tūm-tūmd a Poll yeela kiris-neb nins sēn paam vuusem sōng zaeerbā woto: "Tōnd sā n gūud būmb pidsg ne tēbo, baa tōnd sēn ka ne-a, tōnd gūuda yē ne sū-mare." (Rom 8:25) La yaa woto ne kiris-nebā fāa sēn saagd n na n wa paam vuum sēn kōn sa wā. Baa d sēn nan pa paam d keoorā, d tēebā tara pānga, tu d gūud 'keoorā sēn be taoorā' ne sū-mare. Wa a Moiizi, tōnd pa get vuum nins d sēn tūm a Zeova tūvūmdā wa bōn ye. D kusa sūd tu "būmb nins nin sēn ne wā loogdame, la būmb nins nin sēn ka ne wā paada wakat sēn ka seta."—**Karm-y 2 Korēnt dāmb 4:16-18.**

18 D sā n tar tēbo, d tara kaset sēn wilgd tu "būmb n be neb sēn ka yāt ye." (Heb. 11:1) Ned sēn pa tar tēeb pa mi t'a Zeova raabā maaneg tara yōod ye. Ne ned a woto, tūm Wēnnaam tūvūmā yaa 'yalemdo.' (1 Kor. 2:14) La tōnd saagd n na n wa vuumda wakat sēn kōn sa, la d yā kūum vuugrā. Dūniyā neb pa tol n tēed rē ye. Wa a Poll wakatē wā neb kēer sēn da yeel t'a yaa "gom-to-nedā," rūndā-rūndā me, nebā fāa la bal tagsdame tu tōnd sēn moond būmb ninsā yaa gom-vūdo.—Tūv. 17:18.

19 Dūniyā neb sēn pa tar tēeb tu d yaool n vu b svkā, d segd n modga wusg tu d tēebā kell n tall pānga. Woto wā, kos-y-yā a Zeova t'a sōng-y tu y "tēeb ra koms ye." (Luk 22:32, Sebr Sōngo) Ra yīm-y tu sū-noog ning yel-wēnā sēn kōtā pa kaoosde, la t'a Zeova tūvūmdā tara yōod wusg ye. Sēn paase, tagsd-y vuum sēn kōn sa wā a Zeova sēn pulm-y-yā yelle. La a Moiiz mak-sōngā zāmsda tōnd būmb a taab me. Sōsg ning sēn pugdā na n wilga a tēebā sēn sōng-a to-to t'a yā "nebā nin sēn ka tōe n yā a soabā."—Heb. 11:27.

18, 19. a) Bōe yīng tu d segd n modg wusg tu d tēebā kell n tall pānga? b) Bōe yell la sōsg ning sēn pugdā na n gome?



Yāmb nee “nebā nin sēn ka tōe n yā a soabā” bū?

“[A Moiiz] talla tēeb kān-kāe wa a yāa nebā
nin sēn ka tōe n yā a soabā.”—HEB. 11:27.

SĀ N YAA WA Y NEE
“NEBĀ NIN SĒN KA TŌE N
YĀ A SOABĀ,” . . .

wān to la na n sōng-y tu y pa
zoe ninsaalba?

wān to la na n kūt tu y rat
n moon koe-noogā ne y sūr
fāa?

wān to la na n sōng-y tu y
tall tēeb kān-kāe to-kāsengā
sasa?

A FARAŌ ra yaa rīm-kāsenga, tu Ezipt nebā waoogd-a wa wēnde. Sebr a ye yeelame tu Ezipt nebā nifē, a Faraō “yamā ne a pāngā yūda tēng zug bōn-naandsā fāa.” A Faraō ra ratame tu nebā zoe-a. Rē n so t'a kūt tu b maan ruruug wōneg a maanfā zugu. B maan-a lame t'a zēk a zug wa a sēn dat n ke. Woto ra wilgdame tu rīmā tōe n sāama a bēebā tao-tao. Mams-y-yā a Moiiz tagsg sēn yu a soab a Zeova sēn wa n tūm-a a Faraō nengē wā. A yeel-a-la woto: “Mam na n tūma foom Faraō nengē tu f tu yiis mam nebā sēn yaa Israyell yagensā Ezipt soolmā pugē.”—Yik. 3:10.

2 A Moiiz kēnga Ezipti, n tu taas a Faraō Wēnnaam koeegā, t'a Faraō sūurā yik wūsgo. A Zeova sēn kūt tu tood a wē nams Ezipt nebā poore, a Faraō sūur puugame, hal t'a yeel a Moiiz woto: “Gūus f meng la f ra le wa mam nengē yes ye. Tu bōe, mam sā n le yā foo ka, fo na n kiime.” (Yik. 10:28) La nand t'a Moiiz looge, a yeelame tu rīmā bi-ribl-kāsengā na n kiime. (Yik. 11:4-8) Rē poore, a yeela Israyell nebā tu zak

-
- 1, 2. a) Bōe yīng tu ra wōnd a Moiiz segd n yēesa a Faraō? (Ges-y fotā sēn be yīngrā.) b) Bōe yīng t'a Moiiz pa zoe rīmā?

fää segd n kuu boeg wall pe-raoogo, n yäk a zuumä n mes b rotä lug a yiibä zut la b rig-noyä zutu. Pe-raoog kuvb yaool n da yaa kisg ne sën da waoogd-b Ezipt nebä wënnnaam a Ra wä. (Yik. 12:5-7) A Moiiz pa yees a Faraõ sën da töe n maan bumb ningä ye. Böe yinga? A saka a Zeova n pa zoe rïmä, bala, "yë talla tãeb kän-käe wa a yää nebä nin sën ka töe n yä a soabä."—**Karm-y Hebre dãmb 11:27, 28.**

³ Yamb tãebä tara päng tu yaa wa y töe n 'yää Wënnnaam' bu? (Mat. 5:8) Bu d gom a Moiiz kibarä yelle. Rë na n sõng-d lame tu d tãebä päng paase, hal tu lebg wa d nee "nebä nin sën ka töe n yä a soabä." Wän to la a Moiiz sën da tãed a Zeova wä sõng-a t'a pa zoe ninsala? Wän to la a wilg t'a tãeda Wënnnaam pulemsä? Sën na n baase, yë ne Israyell nebä sën wa n be yell pugë, wän to la sën da wönd a nee "nebä nin sën ka töe n yä a soabä" sõng-a?

A MOIIZ "KA ZOE RIMÄ YE"

⁴ Sä n da yaa ne neb nins sën pa tar tãebä, a Moiiz pa töe n mak a meng ne a Faraõ ye. Wönda a Faraõ ra töe n maana a Moiiz a sën dat fää. A Moiiz meng soka a Zeova woto: "Maam la ända n na n këng Faraõ nengë n tu yiis Israyell nebä Ezipt soolem pugë?" (Yik. 3:11) Na maan yuüm 40 sën deng rë, b ra baooda a Moiiz n na n ku t'a zoe n yi Ezipti. Töe t'a tagsame t'a sä n leb Ezipti, pa na n yu Yam bumb ye. Bala, rïmä súur töe n yika ne-a.

⁵ Nand t'a Moiiz leb Ezipti, Wënnnaam wilg-a-la bumb sën tar yôodo. A Moiiz wa n guls a rë a Zoob

³. Sogs-bus la d na n leoke?

⁴. Sä n yaa ne neb nins sën da pa tar tãebä nifë, a Moiiz yaa wän a Faraõ taoore?

^{5, 6.} Böe n sõng a Moiiz t'a zoe a Zeova, n pa zoe a Faraõ?

sebrä pugë, n yeele: "Yaa Zu-soabä zoees la yam." (Zoob 28:28) A Zeova ratame t'a Moiiz zoe yë n paam yam. Rë n so t'a wilg-a welgr ning sën be yë sën yaa Wënnnaam sën töe fää wä ne ninsaalbä svä. A soka woto: "Yaa ända n naan ninsaal noore? La ända n kut tu yë lebg muk wall wunga, la ända n köt yë nini wall kut t'a lebg zõanga? Ka mam sën yaa Zu-soabä la?"—Yik. 4:11.

⁶ Gom-käensä sõnga a Moiiz t'a bäng tu sën yaa a Zeova n tum-a wä, a pa segd n yees ye. A ra na n kõ-a-la raoodo, t'a tu taas a Faraõ koegä. A Faraõ pa töe a Zeova ye. Tõeg-y tu Wënnnaam da zoe n sõnga wën-tüudb sën da be yell pugë Ezipti. Töe t'a Moiiz tõega a Zeova sën kogl a Abrahaam, a Zozef la yë mengä n fäag-b Faraõ-rämb a taab nugë. (Sing. 12:17-19; 41:14, 39-41; Yik. 1:22-2:10) A Moiiz sën da tãed a Zeova sën yaa "nebä nin sën ka töe n yä a soabä," a talla raoodo, n tu taas a Faraõ koees nins fää a Zeova sën togs-a wä.

⁷ Saam-bi-poak yuür sën boond t'a Ella me talla tõebo, tu sõng-a t'a pa zoe ninsaalb ye. Yuüm 1949, KGB wä yöka a Ella Estoni soolmë wä, n yees a futä n bas-a a zaala, tu polüs-rämb sën yaa kom-bus ges-a. Ad a sën yeele: "Yänd ra tara maam. La m sën puüs a Zeova, m Yam gäanda bâane." Rë poore, b paga a Ella ro-bil pugë, t'a pa be a yembr rasem a tä. A paasa woto: "Polüs-rämbä ra yetame: 'Tõnd na n kutame tu ned ra le tõeg a Zeova yuürä Estoni soolmë wä meng ye. Fo na n këng bâens roogë, tu f taabä këng Siberi.' B kell n yaala maam, n sok woto: 'Fo Zeova wä bee yë?' " A Ella ra na n zoee ninsaalbä bu, bu a na n teega a Zeova? B wa n yeel-a lame t'a sä n sak n bas koe-moonegä, b

^{7.} Wän to la saam-bi-poak tõeb sõng-a t'a pa zoe ninsalba?

na n yiis-a lame. La a talla raood n leok woto: "Mam tagsa yāoā zug neere, la m sēn na n be bāens roogē n tar zood ne Wēnnaam n sāo m sēn na n be yung n yaool n pa tat a Yam." A Ella tēebā ra kūtame tu yaa wa a ne a Zeova, wa a sēn ne rapā sēn be a taorā. Rē sōng-a lame t'a kell n sak a Zeova.

8 Yāmb sā n tēed a Zeova, na n sōng-y lame tu y ra zoe rabeem ye. Tēngā taoordāmb sā n wa rat n gudg yāmb tu y ra tū Wēnnaam, tōe n wōnda b na n tōog n maana yāmb būmb ning fāa b sēn date. Tōe meng tu y wa maand sāmb-sāmb ne sā n yaa yam būmb tu y kell n maan a Zeova raabā tu tēngā taoor-dāmb sūur yik ne-yā. Sā n wa yaa woto, bū y tēeg tu y sā n tēed Wēnnaam, na n sōng-y lame tu y ra zoe ninsaalb ye. (**Karm-y Yelbūn 29:25.**) A Zeova soka woto: "Yaa bōe tu fo zoet ninsaal sēn na n ki la ninsaalb kamb sēn na n wa yū wa moodā?"—Ezai 51:12, 13.

9 Tags-y y Ba sēn ka to wā yelle. A nee neb nins b sēn namsdā, n zoet b nimbaaneg la a sōngd-ba. (Yik. 3:7-10) Baa y sā n wa segd n gom y tēebā yell nanambs taoore, "bū y ra maan yuur ne yāmb sēn na n yu wān n gome, wall yāmb sēn na n togs būmb ning ye. Wakat kāng bala, b na n wilga yāmb y sēn na n gom būmb ninga." (Mat. 10:18-20) Tēnsā taoor-dāmbā ne nanambsā pa tōe a Zeova ye. Y sā n modg tu y tēebā tall pānga, y na n kūsa sūd t'a Zeova beeme, la t'a rat n sōng-y lame.

A MOIZ RA TĒEDA WĒNNAAM POLEMSĀ

10 Yūvmd 1513 sēn deng a Zezi

8, 9. a) Bōe n tōe n sōng-y tu y ra zoe ninsaalba? b) B sā n wa namsd-y y tēebā yīngā, ānda yell la y segd n tagse?

10. a) Bōe la a Zeova yeel Israyell nebā tu b maane? b) Bōe n kūt'a Moiz maan Wēnnaam sēn yeelā?

rogmā, a Zeova yeela a Moiz ne a Aarō tu b togs Israyell nebā tu b bao pe-raoog wall boeeg n ku, n yāk a zuumā n mes b rotā lug a yībā zut la rig-noyā zutu. Yu Nizā kiuugā pugē. (Yik. 12:3-7) A Moiz manesem yū wāna? Tuum-tumd a Poll wa n goma a yelle, n yeele: "Ne tēebo, yē maana Pak n mes zum, tu sēn sāam-dā kom-dēemsā ra sūs Israyell kambā ye." (Heb. 11:28) A Moiz ra miime t'a Zeova pidsda a pulemsā, n da kūs sūd t'a na n ku Ezipt soolmā kom-dēemsā fāa.

11 Wōnda rē t'a Moiz kom-dibli wā ra bee Madiā, tu "sēn sāam-dā kom-dēemsā" pa na n ta be ye.* (Yik. 18:1-6) La a saka a Zeova, n wilg Israyell neb a taabā zagsā rāmb b sēn na n maan to-to n kogl b kom-dibli wā. Ra yaa yōor yelle. A Moiz sēn nong a taabā yīngā, a yū tao-tao n bool "Israyell kāsem-dāmbā n yeel bāmb yaa: 'Kēng-y n tu yāk-y rūm-bi . . . n ku Pak maoongo.'"—Yik. 12:21.

12 Rūndā-rūndā, a Zeova nin-buiidā moonda koeg sēn tar yōod wusgo, tu malegs sōngd-ba. B yeta nebā woto: "Bū y zoe Wēnnaam la y waoog bāmba, tu bōe, bāmb būud kaoob wakat taame. Bū y waoog sēn naan-a yīngā la tēngā ne ko-kāsengā la ko-bundsā." (Wil. 14:7) Yaa masā la d segd n moon koe-kāngā, n wilg d taabā tu b segd n yīi Babilon-kāsengā pugē, n da wa "paam a toodā ye." (Wil. 18:4) A Zezi 'piis a taabā' naaga kiris-neb nins sēn paam vuusem sōng zaeerbā, n kot nebā tu b "maneg [b]

* A Zeova toma malegs tu b wa sāam Ezipt nebā kom-dēemsā fāa.—Yuul 78:49-51.

11. Bōe yīng t'a Moiz yū tao-tao n wilg Israyell nebā būmb ning a Zeova sēn yeelā?

12. Koe-bug sēn tar yōod la a Zeova yeel tu d taas nebā?

yell ne Wēnde."—Zā 10:16; 2 Kor. 5:20, *Sebr Sōongo*.

13 D kūsa sūd tu 'buudā kaoob wakat taame.' D kūsa sūd me t'a Zeova sēn yeel tu koeegā mooneg la karen-biisā maaneg yaa tūum-yāgdmā, a tara būum. Tom-tomd a Zā ra yāa bōn-makre. A "yāa malek-rāmb a naas sēn yas dūniyā kurems a naase, la bāmb yōka dūniyā sobd a naasā." (Wil. 7:1) Yāmb tēebā kutame tu yaa wa y nee maleg-kāensā sēn dat n bas sobdā tu to-kāsengā sung bū? Sā n yaa woto, y na n ket n moonda koe-noogā ne yēesem.

14 Kiris-neb hakukā zoe n tara a Zeova zoodo, n saagdē me n na n wa vūmd wakat sēn kōn sa. La d miime tu d segd n sagla nin-wēng "t'a bas a manesem-wēngā n paam n vūmde." (**Karm-y Ezekiel 3:17-19.**) Baasgo, pa rē yīng bal la d sēn moondā ye. Yaa d sēn nong a Zeova la d taabā yīng me. A Zezi wēe yel-bünd n gom Samari nin-sōng yelle, n wilg nonglem la nimbaan-zoeer hakuk sēn dat n yēelga. Yuta sōma tu d ned kam fāa sok a meng woto: 'Mam yaa wa Samari nedā, n zoet nebā nimbaaneg n moond-b koeegā bū?' D pa tol n dat n wōneg maan-kvūdā ne Levi nedā ye. D pa tog n baood padems n pa moond koeegā ye. (Luk 10:25-37) D sā n tēed Wēnnaam pulemsā la d nong d taabā, d na n maana d sēn tōe fāa koeegā mooneg pugē, tu ra wa kē n bōog ye.

13. Bōe n na n kut tu y rat n moon koe-noogā ne y sūur fāa?

14. Bōe yīng tu d rat n sagl nin-wēng "t'a bas a manesem-wēngā"?



Y sā n tēed a Zeova pulemsā, na n kutame tu y moond koe-noogā ne yēesem
(Ges-y sull 13)

“ISRAYELL NEBĀ PLŪUGA MOG-MIUUGĀ”

15 Israyell nebā sēn wa n yit Eziptā, b wa n bee yell pugē. Wakat kānga, a Moiiz sēn da tēed “nebā nin sēn ka tōe n yā a soabā,” sōng-a lame. Biiblā yeela woto: “Israyell nebā nakame n yā Ezipt rāmbā sēn pugd bāmb n watē. La rabeem wusg yōka bāmba. La Israyell nebā zēka b koees n bool Zu-soabā.” (Yik. 14:10-12) La woto ra pa segd n ling-b ye. Bala, a Zeova ra yeelame: “Mam na n kenga Faraō sūur t'a babs bāmba. La mam na n paama waoogr Faraō ne a tāb-biisā fāa yīnga, la Ezipt rāmbā na bāng tu mam yaa Zu-soabā.” (Yik. 14:4) Baasgo, Israyell nebā pa tall tēeb ye. B sēn da ne bal yaa mog-miuugā sēn be b taoor tu b pa tōe n puvugā, a Faraō saar-dāmbā sēn wat tao-tao wā, tu bāmb taoor-lutā yaool n yaa pe-kūm sēn tar yuum 80 wā. B tagsame tu b yellā pa tar tum ye.

16 La a Moiiz pa yees ye. Bōe yīnga? Bala, a ra nee sēn yūd mogrā la sodaasā. A ra miime t'a Zeova na n zab n sōnga Israyell nebā, n fāag-ba. (**Karm-y Yikr 14:13, 14.**) A Moiiz sēn wilg tēeb woto wā kenga Wēnnaam nin-buiidā pelga. Biiblā yeela woto: “Ne tēebo, Israyell nebā puvuga mog-miuugā wa tēn-koeenga, la Ezipt nebā sēn mak n na n maan woto, koom du bāmba.” (Heb. 11:29) Rē poore, “nebā zoe Zu-soabā, la bāmb tēe Zu-soabā ne b tum-tumd a Moiiz.”—Yik. 14:31.

17 Ka la bilfu, na n wa yū wa d bēebā na n tōog-d lame. Nand tu Armagedō zabrā sūnge, tēnsā taoor-dāmb na n sāama tūudum toor-toor sēn tar pāng n

15. Bōe yīng tu Israyell nebā tags tu b yellā pa tar tum?

16. Wān to la a Moiiz tēebā sōng-a t'a pa yees mog-miuugā noore?

17. Yel-bug n wat tu yaa tulae tu d tall tēebo?

yūd tōnd tūudmā. (Wil. 17:16) A Zeova togsa bāngr-gomde, n wilg tu wakat kānga, tōnd na n yū wa neb sēn zī “tēns sēn ka tar lals ne kuvlens pusē.” (Eze. 38:10-12, 14-16) Neb nins sēn na n ges bēebā balā tōe n wa tagsame tu d pa tōe n pōs ye. La yāmb manesem na n yū wāna?

18 D pa segd n yees ye. Bōe yīnga? Bala, a Zeova sēn togs tu b na n zaba ne a nin-buiidā poore, a wilgame t'a na n zab n sōng-b lame, n fāag-ba. A yeela woto: “Gog sā n wa n na n zab ne Israyell nebā b tēngā pugē, baraare, mam sūur na n yikame n puugi. Mam yaa Zu-soab a Wēnnaam, yaa maam n yeele.” (Eze. 38:18-23) A Zeova na n sāama neb nins fāa sēn dat n zab ne a nin-buiidā. Y sā n tēed ne y sūur fāa t'a Zeova na n kogl-y-la a “ra-kāsengā sēn tar dabeemā” daare, na n yū wa y zoe n ne a Zeova sēn fāagd-y-yā, tu rē sōng-y tu y kell n sak-a.—Zoell 3:4, 5.

19 Maan-y y sēn tōe fāa n kell n tall “tēeb kān-kāe wa [y] yāa nebā nin sēn ka tōe n yā a soabā,” tu rē la y segend y meng n gūud bōn-kāsemis nins sēn watā. Karemd-y Biiblā la y puvud daar fāa, tu yāmb ne a Zeova zoodā pāng paasdē. A Moiiz ne a Zeova zoodā ra tara pāng, t'a sōng-a t'a tum tūum-kāsemse, hal tu Biiblā wilg tu no-rees a to pa zīnd n “mi Zu-soabā sōma” wa a Moiiz ye. (Tōo. 34:10) A Moiiz yū no-rees-kāsengā. Y sā n tar tēebo, yāmb ne a Zeova zoodā me na n talla pāng, tu yaa wa y ne-a lame. Biiblā wilgame tu y sā n tēegd a yell būmb ning fāa y sēn maandā pugē, ‘a na n demsa y sorā.’—Yel. 3:6.

18. Bōe n tōe n sōng-y tu y tall tēeb kān-kāe to-kāsengā sasa?

19. a) A Zeova ne a Moiiz zoodā ra yaa wān-wāna? b) Y sā n tēegd a Zeova yell būmb ning fāa y sēn maandā pugē, bark bug la y na n paame?



Ned ka be n tōe n sak zu-soben-dāmb a yiib ye

"Ned ka be sēn tōe n sak zu-soben-dāmb a yiib ye. . . .

Yāmb ka tōe n sak Wēnnaam la arzegs yiib fāa ye."—MAT. 6:24.

DAAR fāa, a Marilyn sūd a James sigda tuvma ne yaamse.* La a pa paamd ligd tu sek a na ra būmb nins sēn yaa tlae ne-bā ye. A Marilyn rat n sōnga a sūdā, la a ra teed kēer n kō a biig a Jimmy, tu yē me wōneg a karen-bi-taasā. A rat n sōnga a roagdb kēer me, la a paam ligd n bīngi. A zo-rāmb wusg kēnga tēns a taab n na n tu bao ligdi. La a Marilyn sā n da tags loog n bas a zakā rāmb yelle, a yamā yuusdame. Bōe yīnga?

² A ra yeesda rē sēn na n wa ne zu-loees ninsā. B ra teenda taab a Zeova tūudmā pugē. A sā n looge, wān to la b na n tōog n ket n maand rē? La a ra mii neb sēn bas b zags n tu tumd tēn-zēmse, tu yē sā n getē bū yaa wa b ket n tūuda a Zeova. La rē yīnga a na n tōog n tūnuga ne ēnternetā n wub a biigā ne a Zeova 'saglg la a zāmsg' bu?—Ef. 6:4.

³ A Marilyn baoa saglse. A sudā ra pa rat a loogrā ye. La a yeelame t'a sā n yāk yam n na n looge, yē pa na n gūdg-a ye. Kāsem-dāmbā ne tīgingā neb a taab sagl-a lame t'a ra looge, la saam-bi-pogs kēer yeel-a lame t'a segd n loogame.

* D toeema yuyā.

- 1-3. a)** Zu-loe-bus la zags wusg segda, la wān to la kēer maood n na n welg-ba? (Ges-y fotā sēn be yīngrā.) b) Roagd sā n wa rat n bas a zakā rāmb n tu bao tuvma, zu-loe-bug la a tōe n paam kambā wubr wēengē?

YĀMB TAGSG YAA WĀNA?

Biiblā verse bus n wilgd d sēn segd n ges d zagsā rāmb yell to-to wā?

Wān to la d sēn maand būmb ninsā tōe n wilg tu d tūuda a Zeova bala?

D sā n lōlus a Zeova raabā taoore, wān to la a na n ning-d barka?

B ra yeta woto: "Fo sā n nong f zakā rāmba, f segd n loogame. F tōe n ket n tūuda a Zeova." Baa a Marilyn sēn da maand sāmb-sāmbā, a basa a James ne a Jimmy, n kēng tēn-zēng n na n tu tume.* A pūlmame t'a pa na n kaoos ye.

BÖE LA BIIBLĀ YET ZAK RĀMB YELL GESGĀ WĒENGĒ?

⁴ A Zeova pa rat t'a nin-buiidā ki kom ye. (Yul 37:25; Yel. 30:8) Hal pīnd wēndē, wēn-tūfdb n yik n toeem zīis sēn na yul n pōs kom. Kom yīng kutame t'a Zakoob tum a kom-dibli wā tu b tu ra ruub Ezipti.* (Sung. 42:1, 2) La rūndā-rūndā, neb wūsg sēn basd b zagsā rāmb n yikd n toeemd zīisā pa kom yīng ye. Kēer tara sam wusgo. Sānda sēn vūē wā neb yaa naong rāmbā. B sēn dat n paam naar vūmā kutame tu wūsg bas b zags n yik n kēng zīig a to b tēngā pūgē wall tēn-zēng n na n tu bao ligdi. Naoor wusgo, ned sēn maand woto basda a kom-bōonegā ne b roagd a ye, b kēema, b yaab-rāmba, wall ne b roagdb a taaba. Pa rē bū ne a zo-rāmba. Baa sēn pa nana ne nin-kāensā tu b bas b zakā rāmb n tu tumd zīig a to wā, b wūsg tagsdame tu sēn maand kae ye.

⁵ A Zezi wakatē wā, neb wūsg ra yaa naong rāmba. Tōe tu b ra tagsdame tu b sā n paam ligdi, b vūmā na n yu noogo, tu b yamā me gāe bāane. (Mark 14:7) La

* Baa sōs-kāngā sēn gomd pagb sēn bas b zags rāmb n na n tu bao ligd yellā, sagls nins sēn be a pūgē wā tōe n nafa pagbā ne rapā fāa.

* A Zakoob kom-dibli wā sā n da bas b zakā rāmb n kēng Ezipt fāa, b pa kaoosd n yud semen a tāab ye. Bāmb ne b ba wā sēn wa n na n tu zīnd Eziptā, b zāa b pagbā la b kambā.—Sung. 46:6, 7.

4. Bōe yīng tu neb wūsg mi n yik n tu tumd tēn-zēngā, la ānd dāmb n wubd roagdb nins sēn maan woto wā kamba?

5, 6. a) Bōe la a Zezi yeel sū-noogā la bāanā wēengē? b) A Zezi zāmsa a karen-biisā tu b pūus n kos bōe? d) A Zeova sēn pūlem t'a na n ning-d-la barkā rat n yeelame tu bōe?

a Zezi ra pa rat tu b teeg arzegsā sēn pa paad wakat fāa wā ye. A ra ratame tu b teeg a Zeova, bala bark nins a sēn kōtā paada wakat fāa. A sēn wa n zāmsd nebā tāngā zugā, a wilgame tu pa arzek wall tōnd meng modgr n wat ne sū-noog la bāan hakuk ye. Yaa d sēn na n tar d saasē Ba wā zoodo.

⁶ A Zezi sēn wa n zāmsd a karen-biisā pūvsgā, a pa yeel tu d kos naar vūm ye. A yeelame tu d kos a Zeova t'a kō-d 'd ruub rūndā,' sēn yaa būmb nins sēn yaa tulae ne-d daar fāa wā. A yeela a kēlgbā woto vēenega: "Bu y ra bīng-y paoong dūniyā ka . . . ye. Bīng-y yāmb paoongā ["saasē," MN]." (Mat. 6:9, 11, 19, 20) D tōe n kusa sūd t'a Zeova na n ning-d-la bark wa a sēn pūlmā. Bark-kāng pa būmb sēn wilgd tu d tata a yam bal ye. Wilgdame t'a na n kō-d-la būmb nins sēn yaa tulae ne-dā me. Sūd me, sēn na yul n paam sū-noog la bāan hakuka, d segd n teega d Ba a Zeova laka, pa arzegsā ye.—**Karm-y Matie 6:24, 25, 31-34.**

⁷ Būmb d sēn tōe n maan n wilgd tu d baooda Wēnnaam tūrlmā yaa d sēn na n get d zakā rāmb yell wa a sēn datā. Wala makre, a Moiiz tōogā wilgame tu roagdbā segd n zāmsa b kambā a Zeova noyā. Kiris-neb nins sēn dat n ta a Zeova yamā segd n maana woto. (**Karm-y Tood 6:6, 7.**) Yaa kambā roagdbā la Wēnnaam kō tūm-kāngā, pa b yaab-rāmbā wall ned a to ye. Rīm a Salomo yeelame: 'M biiga, reeg f ba zāmsgo, la ra bas būmb nins f ma sēn wilg foomā ye.' (Yel. 1:8) A Zeova ratame tu zak rāmb vū ne taaba, tu roagdb a yiibā fāa tōe n zāms b kambā la b wilg-b sore. (Yel. 31:10, 27, 28) Kambā sā n be ne b roagdbā daar fāa, n wūmd b roagdbā sēn gomd a Zeova

7. a) A Zeova ratame tu ānd dāmb wub kamba? b) Bōe yīng tu yaa roagdb a yiibā n segd n wub b kambā?



F pa tōe n tūnug ne ēnternetā n mobg f biig ye
(Ges-y sull 10)

yelle, la b ne būmb nins b sēn maand a tūudmā pugē wā, b tōe n dūka b togs-n-taare.

ZU-LOEES Y SĒN DA PA TĒEDE

8 Neb wusg sā n wa rat n bas b zags n tu bao ligdi, b miime tu na n waa ne zu-loeese. La ned pa tōe n bāng zu-loe-kāens fāa ye. (Yel. 22:3)* A Marilyn loogrā poor bala, a sūurā singa sāoongo, a sēn pa le be ne a zakā rāmbā yīnga. Ra sāamda a sūurā la a biigā sūur me. A sā n da bool fāa, a biig a Jimmy sokd-a-la woto: "Bōe yīng tu fo loog n bas maam?" A Marilyn ra tagsame tā na n maana kiis a wān bala. La wa n lebga yūuma. Sēn paase, a zakā neb manesem toeemame, tu sāamda a sūuri.

* Ges-y yūmd 2013 wao-fugdg kiuugā Réveillez-vous ! wā sōsg ning gom-zug sēn yaa: "Émigration : rêves et réalités".

8, 9. a) Roagd sā n bas a zak rāmb n looge, wae n wata ne bōe? b) Roagdbā ne b kambā sā n pa vu ne taaba, wata ne zu-loe-buse?

Wala makre, a Jimmy pa le nong goama, n pa le sakd n togs-a būmb sēn be a sūurē ye. A Marilyn yeela woto: "A pa le nong maam ye."

9 Roagdbā ne b kambā sā n pa vu ne taaba, tōe n kūtame tu b pa nong taab sōma ye. Tōe n kūtame meng tu b sēn tagsd būmb ning sōma ne wēngā wēengē wā toeeme.* Kambā sā n yaa bōonese, tu roagdbā bas-b n tu kaoose, zu-loees nins welgrā sēn wat ne wā me na n yu wusgo. A Marilyn yeela a Jimmy tu būmb ning fāa a sēn maandā yaa yē yīnga. La a Jimmy ra tagsdame tā ma pa le nong-a ye. Sungē wā, a ma wā sēn da zār ne-bā sāamda a sūuri. La kaoosg zugē, a ma wā sā n da lebg n wa na n ges-ba, a sēn be yambē wā sāamda a sūuri. A Jimmy wa n tagsda wa kamb wusg sēn zār ne b roagdb sēn tagsdā, n getē tā ma pa le tar sor n na n yeel tu yē nong-a la a waoogd-a ye.—**Karm-y Yelbún 29:15.**

10 A Marilyn ra toonda a Jimmy ligd la būmb a taaba, n tagsdē tu rē na n kūtame tu yē sēn zār ne-a wā ra sāam a sūur wusg ye. La a wa n bāngame tā kēesda a biigā weoogo. Ra yaa wa a wilgd-a lame tā segd n nonga ligdā n yūd a zakā neb la a Zeova menga. (Yel. 22:6) A Jimmy wa n yeel-a lame tā kell n pa be n toond ligd la būmb a taaba. A Marilyn wa n bāngame tā pa tōe n tūnug ne lēta, telefōn la ēnternetā n wub a biigā tu

* Tēns wusg posē, bāngdbā wilgame tu ned sā n bas a pag wall a suda, pa rē bū a kamb n tu tomd tēn-zēngā, wata ne zu-loe-kegemse. Wala yoobo, rap sēn kēed ne rap wall pagb sēn kēed ne pagba, pa rē bū ned sēn kēed ne ned a sēn kī ne. Tōe n kūtame tu kambā pa le karemd sōma, pa rē bū b sūyā yikd tao-tao, wall b maand yure. B yamā tōeeme n pa le be b mense, wall b tagsdē tu b sēn kiid n sāo.

10. a) Roagd sā n kōt a kamb kūun n yaool n pa be yambē, tōe n waa ne bōe? b) Bōe la roagd sēn dat n pa yūg n wub a kamb pa tōe n maane?

zems ye. A yeelame tu f pa tōe n tūnug ne ēnternetā n mobg f biiga, wall f tall-a n tu gāneg ye.

11 A Marilyn ne a Zeova zoodā pāng boogame. Semen fāa, yaa vugr la a kēnd tigissā la a yit koe-moonegā. Wakat ninga, a pa tōogd ye. Yē ne a sūdā me ra pa le noom woto ye. Sēn paase, a tūmdā taoor-soab ra rood-a lame, tu pa nana ye. A Marilyn ne a James sēn da zār ne taab n pa tōe n teeg taab b zu-loees sasa wā, b ned kam fāa baoa belsg zīig a to. Woto wa n kitame tu ra kellē bilf tu b yo. A Marilyn bāngame tu baa bāmb sēn pa yo wā, b kāadmā tōe n sāamame. Biiblā sagenda sēn kē-b kāadmā tu b ned kam fāa segd n wilgame t'a nonga a to wā, la a kō-a a rēnd lagengā wēengē. A Marilyn ne a James sēn zār ne taabā, b pa tōe n ges taab yell sōma woto ye. (Sal. Yuł. 1:2; 1 Kor. 7:3, 5) Sēn paase, bāmb ne b biigā pa tōe n teel taab a Zeova tūudmā pugē ye. A Marilyn yeela woto: "Mam sēn wa n wum tigis-kāsengē tu d sā n dat n pōs a Zeova ra-kāsengā sasa, d segd n maanda zak pugē Biibl zāmsgā n pa vaandē wā, m bāngame tu m segd n lebg n kulame." A ra segd n lebs n manega yē ne a Zeova zoodā, la a mao tu yē ne a zakā rāmb le vu ne taab ne sū-noogo.

SAGL-SŌMA LA SAGL-YOODO

12 A Marilyn sēn wa n yeel t'a na n lebg n kulame wā, neb kēer kō-a-la sagl-sōma, tu sānda kō-a sagl-yoodo. A sēn da be tiging ningā kāsem-dāmb pēg-a lame. La neb a taab sēn da bas b zags rāmb wa yē bao n na n komsa a raoodo,

11. a) Ned sā n bas a pag bu a sūd n tu tūmd tēn-zēnga, wān to la tōe n sāam b kāadmā?
b) Bōe n sōng a Marilyn t'a bāng t'a segd n lebg n kulame?

12. Biiblā sagl-bug la d tōe n kō sēn bas-b b zags rāmb n tu tūmd tēn-zēngā?



Pag ne a sūd sā n zār ne taaba, zu-loe-bug
la b tōe n paame?

(Ges-y sull 11)

n da yetē t'a sā n lebg n kuli, a pa tōe n tu paam ligd tu sek-a ye. Wall tu b ruk a togs-n-taarā, b ra yet-a-la woto: "Pa na n kaoos la fo lebg n wa ka ye." La kiris-nebā pa segd n maan woto ye. B segd n sagla "pug-bi tu b nong b sūdbā ne b kambā, . . . la b ges b zak yell neere, . . . tu Wēnnaam goamā ra paam tūvsg ye."

-Karm-y Tūt 2:3-5.

13 Neb wūsg sēn tu tūmd tēn-zems sēn yi tēns ninsā neb tara minimd b fāa sēn segd n tū. Ne bāmba, b segd n saka b roagdbā raabo, sēn yūd fāa, b ma wā ne b ba wā raabo. Rēnd kiris-ned roagdb sā n wa rat t'a maan būmb sēn pa zems ne a Zeova raabā, yaa tulae t'a tall tēeb sēn tar pāng n tōog n zāgse.

13, 14. Kiris-ned roagdb sā n wa rat t'a maan būmb sēn pa zems ne a Zeova raabā, bōe yīng tu yaa tulae t'a tall tēeb? Ruk-y makre.

14 Wala makre, a Carin yeela woto: "Mam sēn wa n dog m biig a Don tu maam ne m sūdā bee tēn-zēng n tūmdē. Rē tu mam nan singa Biiblā zāmsgo. Tōnd roagdbā fāa ra tēedame tu mam na n talla a Don n wa bas ne m baaba la m ma, tu b wub-a n wa tāag wakat ning maam ne m sūdā sēn na n paam ligd wusgo." A Carin yeelame t'a na n wuba a biig a toore, t'a sūdā ne a roagdbā fāa yaand-a, n yetē t'a yaa kruuma. A Carin paasa woto: "Wakat kānga, m da pa tolg n kis sūd tu m sā n tu bas a Don ne m roagdbā yūum a wān yīnga, yaa wēng ye. La m da miime t'a Zeova ratame tu tōnd sēn yaa roagdbā wub d biigā." A Carin sēn wa n le ruk puga, a sūdā sēn pa a Zeova Kaset soabā yeelame t'a yiis puga. A Carin sēn da zoe n yāk yam tu yū sōma wā sōng-a lame, t'a tōog n kell n sak a Zeova, n pa yiis pugā ye. Rūndā-rūndā, yē ne a sūdā la b kambā sūur nooma b sēn be ne taabā. A Carin sā n da tall a biig a ye wall b yiibā fāa n tu kō neb a taab tu b wubi, yelā ra tōe n yū toor fast.

15 Saam-bi-poak yūvur sēn boond t'a Vicky yeela woto: "Mam roagdbā tu basa maam m yaab-poakā nengē tu m pa be yūum a wāna, tu mam yaoā yaool n da be ne-ba. M sēn wa n leb m roagdbā nengē wā, m mikame tu m pa le nong-b wa pīndā ye. Mam yaoā ra tōe n togs-b-la būmb sēn be a sūrē, n mi n tōe n mobg-ba, hal tu b noom ne taaba. La mam yē ra pa tōe n sōs ne m roagdbā sōma ye. Hal baa m būungā zugē, ra ket n yaa toog ne-m tu m togs-b būmb sēn be m sūrē. Mam ne m yaoā yeela d roagdbā tu d na n gesa b yell b kūvlem zugē. La mam na n maana rē m sēn mi tu yaa tulaeyā yīnga, tu m yaoā get b yell a sēn nong-bā yīnga."

15, 16. a) Wān to la b wub a Vicky? b) Bōe yīng t'a pa rat n maan woto ne a bi-puglā?

16 A Vicky paasame: "Rūndā-rūndā, m ma ratame tu mam tall m bi-puglā n wa bas ne yē, wa yē sēn tall maam n tu bas ne a ma wā. M maaga m yīng n wilg-a tu m pa na n maan woto ye. Maam ne m sūdā rat n wuba d biigā d toore, n wilg-a a Zeova noyā. Sēn paase, m pa rat tu maam ne m bi-puglā wa pa noom ne taab ye." A Vicky bāngame tu f sā n dat sū-noog hakūka, f segd n nonga a Zeova la a noyā n yūd arzēkā la f roagdbā. A Zezi yeela woto: *Ned ka be sēn tōe n sak zu-soben-dāmb a yiib ye.* Rat n yeel tu ned kae n tōe n pugd Wēnnaam, la a pugd arzegs ye.—Mat. 6:24; Yik. 23:2.

A ZEOVA NINGDA D MODGRĀ BARKA

17 D Ba a Zeova pulmame tu d sā n lūus a Rīungā la a turlmā taoore, a na n kōo tōnd būmb nins sēn yaa tulae ne-dā. (Mat. 6:33) Rēnd baa sā n wa pa nana ne kiris-neda, a pa segd n tags tu sēn maand kae ye. A Zeova pulmame tu sēn wa n yaa zu-loeeg ning fāa la d segda, a na n sōng-d lame tu d kell n tū Biiblā noy n ta a Yam. (**Karm-y 1 Korēnt dāmb 10:13.**) D sā n prūsd a Zeova n kot yam la sor-wilgri, n tūud a saglsā la a noyā, d wilgdame tu d teeg-a lame. (Yul 37:5, 7) A na n nee modgr ning d sēn maand n tūud-a wā, n kōt-d būmb nins sēn yaa tulae ne-dā. A na n ning-d-la bark d sēn maand fāa pugē.—Ges-y Sungr 39:3.

18 La bōe la ned sēn da bas a zak rāmb tōe n maan n welg zu-loees nins rē sēn wa ne wā? Bōe la d tōe n maan n bao būmb nins sēn yaa tulae ne d zakā rāmba, la d kell n pa ne-ba? La wān to la d tōe n sōng d taabā tu b kell n pa ne b zagsā rāmba? Sōsg ning sēn pugdā na n leoka sogs-kāensā.

17, 18. a) Bōe yīng tu kiris-ned pa segd n wa tagsdē tu sēn maand kae? b) Sogs-bus la sōsg ning sēn pugdā na n leoke?



Tall-y raoodo, bala, a Zeova yaa yāmb sōangda!

*"Tōnd tōe n yeela ne daood yaa:
'Zu-soabā yaa mam sōangda.'"*—HEB. 13:6.

YĀMB TAGSG YAA WĀNA?

Bōe la roagdbā segd n maan
n sōng b kambā tu b tall zood
sōma ne a Zeova?

Bōe la zak soben-dāmbā
tōe n maan n bao būmb nins
sēn yaa tulae ne b zagsā
rāmba, la b kell n pa ne-ba?

Kiris-ned roagdb sā n dat t'a
bas a zak rāmb n tu bao ligdi,
bōe la a tōe n maane?

A EDUARDO sēn wa n bas a zakā rāmb n tu be tēn-zēngā,
a ra tara tuvum-sōngo, n paamd ligd wuusgo.* La a sēn wa n
sung Biiblā zāmsgā, a bāngame tu pa ligdā bal n yaa tulae ne
a zakā rāmb ye. A segd n sōng-b-la Wēnnaam tūudmā pugē
me. Woto kitame t'a lebg n kuli.—Ef. 6:4.

² A Eduardo ra miime tu yē sēn lebg n kulā nooma a Zeova.
La ra pa na n yu nana ye. A ra segd n modgame tu yē ne a pagā
la a kambā le vu ne taab ne sū-noogo, la a bao tuvum n tōog n
ges b yelle. Wān to la a ra na n maan dē? Tizingā neb ra na n
sōng-a lame bu?

**GES-Y Y ZAKĀ RĀMB YELL SŌMA,
LA Y SŌNG-B TU B TŪ A ZEOVA**

³ A Eduardo yeela woto: "Mam bāngame tu m basa m kom-pugli wā wakat ning b sēn da rat m saglse, la m sēn da
segd n wilg tu m nong-b lame n yūda. Mam da pa be yambē
n na n karem Biiblā kibay tu b kelge, n naag-b n puuse, n
mobg-b la m deem ne-b ye." (Tōo. 6:7) A bi-pugl-kāseng a

* D toeema yuyā.

1, 2. Ned sēn tu tōmd tēn-zēng sā n lebg n kuli, zu-loe-bus la a tōe n
sege? (Ges-y fotā sēn be yīngrā.)

3. Kamb roagd sā n pa be ne-ba, wān to la namsd kamba?

Anna yeelame: "M baaba sēn da pa be yirā kūtame tu m Yam da pa gāe bāan ye." A paasame t'a sēn wa n lebg n wa wā, bāmb nifē, a ra yaa sāana. A sā n da mobg yē, pa sakd ye.

⁴ Yaa toog ne rao sēn pa vu ne a zak rāmb t'a ges b yell sōma. A Eduardo pag a Ruby yeelame tu yē n da segd n yu ma wā ne ba wā, la tu yaa yē n wae n yākd Yam būmb fāa pugē zakā rāmb yīnga. A paasame: "A Eduardo sēn wa n lebg n wa wā, ra yaa toog ne-m tu m sak-a wa Biiblā sēn yetā. Baa masā menga, m mi n yimame tu m sūdā bee yambē." (Ef. 5:22, 23) A Eduardo yeelame: "Tōnd kom-pugli wā sā n da rat n maan būmbu, b kēngda b ma nengē n tu kos sore. Tōnd a roagdbā bāngame tu būmb sēn na n sōng d kambā yaa d sēn na n naagd taab n yākd Yam. Mam bāngame me tu m segd n lūu taoor zakā yell gesg wēengē wa Biiblā sēn wilgā."

⁵ A Eduardo maana a sēn tōe fāa sēn na yul tu yē ne a zakā rāmb le vuund ne taab ne sū-noogo, la a sōng-b tu b tū a Zeova. A yeelame: "Mam sēn da rat yaa m zāms m kambā Biiblā ne m no-goama, la ne m manesem. M pa rat n yetē bal tu m nong a Zeova ye. M dat n wilgda rē ne m tuumā." (1 Zā 3:18) A Zeova ninga a Eduardo modgrā bark bū? A Anna yeelame tu bāmb sēn da ne b baaba sēn maand a sēn tōe fāa n get b yellā, n paas a sēn modgd sēn na yul tu bāmb le nong-a wā, sōng-b-la wusgo. A paasame: "Tōnd sēn ne a sēn tuum sōma tigingā pugē wā, d sūur noomame. Dūniyā ratame tu d zāag ne a Zeova. La d sēn ne d roagdbā sēn tūud a Zeova ne b sūy fāa wā, kūtame tu tōnd me maand

4. Bōe yīng tu rao sēn pa vu ne a zak rāmb pa tōe n ges b yell sōma?

5. A Eduardo sēn lebg n wa wā, bōe la a maan n na n sōng a zakā rāmba, la rē woma bi-buse?

woto. M baaba pulmame t'a pa na n le bas-d ye. A sūd pa bas-d ye. A sā n da maan woto, tōe tu rūndā-rūndā, m pa le be a Zeova siglā pugē ye."

SAK-Y N DEEG-Y TU Y TARA TAALE

⁶ Kibay kēer wilgame tu zabrā sēn wa n be Balkā wā, baa sēn da pa nana wā, a Zeova Kaset rāmb nins sēn be be wā kambā sūy ra noomame. Bōe yīnga? Roagdbā sēn pa le tōe n kēng tuumā, b ra bee ne b kambā yiri, n deemd ne-ba, n sōsd ne-b la b zāmsd Biiblā ne-ba. Woto wilgda tōnd bōe? Wilgdamē tu kambā nonga b roagdbā sēn na n be ne-b n yūd b sēn na n kōt-b ligd wall būmb a taaba. Sūd me, Wēnnaam Gomdā wilgame tu roagdbā sā n wae n be ne b kambā la b zāmsd-ba, nafd-b-la wusgo.—Yel. 22:6.

⁷ Zu-buko, roagdbā sēn lebg n wa tōe n mikame tu b kambā sūur pa noom ne-ba, wall b maandame tu yaa wa b toor kae ne b sēn lebg n wa wā ye. Rē n so tu roagd ning tōe n yeel a meng woto: 'Mam maana būmb wusg m kambā yīnga. La bōe yīng masā tu b manesmā yaa woto?' La tōe tu yaa roagdā sēn da pa be yambē wā n kut tu kambā manesmā yaa woto. Bōe la roagdā tōe n maane?

⁸ Kos-y-yā a Zeova t'a sōng-y tu y yūwumda, n wilg y zakā rāmb tu b yell pak-y lame. Y sā n wa sōsd ne y zakā rāmba, wilg-y tu y sak n deegame tu y tara taal yellā pugē. Y sā n pelg y pug n kos y zakā rāmb sugri, tōe n sōngame. Yāmb pagā ne y kambā sā n neē y sēn modgd woto wā, b na n bāngame tu y sūd rata b neere. Y sā n tall sū-mar n pa koms raoodo, bilf-bilfu, y na n le wa

6. Zabr a ye sasa, bōe n maane, la rē wilgda roagdbā bōe?

7, 8. a) Bōe n tōe n sāam roagdbā kēer sēn lebg n wa sūuri? b) Bōe la roagd tōe n maan tu yē ne a kambā le noom ne taaba?

paamame tu y zakā rāmb nong-y la b waoogd-y-yā.

GES-Y Y ZAKĀ RĀMB YELLE

9 Tūm-tumd a Poll wilgame tu kirisned sēn kūl sā n pa tōe n ges a meng yelle, a kambā ne a yagensā segd n sōng-a lame. La a sagla kiris-nebā fāa tu b bao būmb nins sēn yaa tulaeyā bala. Wala makre, ruubo, fut la ro-gāaga. D pa segd n maand d sēn tōe fāa sēn na yul n paam naar vūm, wall ligd wusg n bīng ye. (**Karm-y 1 Tūmote 5:4; 8; 6:**

6-10.) Pa tulae tu kiris-ned bao arzegs wusg dūni-kāngā sēn na n loogā pugē, n yaool n tōog n ges a zak rāmb yell ye. (1 Zā 2:15-17) D pa segd n tags tu ligd tōe n welga d zu-loeesā fāa, wall d bas tu “vū-kāngā yelā” kūt tu d zakā rāmb wa kong ‘vūm sēn yaa sūdā’ Wēnnaam dūni-paalgā pugē ye.—Mark 4:19; Luk 21:34-36; 1 Tūm. 6:19.

10 A Zeova miime tu tōnd rata ligdi. La ligd pa tōe n naf tōnd la a kogl-d wa yam ning a Zeova sēn kōtā ye. (Koe. 7:12; Luk 12:15) Naoor wusgo, neb nins sēn dat n kēng tēn-zēms n tu bao ligdā pa mi zu-loees nins rē sēn tōe n wa ne wā fāa ye. Sēn paase, baa fūl pa wilgd tu b na n tu paama ligd ye. Wusg sēn wat n lebg n wa tu b samā yūda b sēn wa n loogdē wā. Lebgda tulae tu b tūm wusg sēn na yul n yao b samā, n pa le tōe n paam sēk n tūm a Zeova tūvmdā sōma ye. (**Karm-y Yelbūn 22:7.)** Sēn yaa sōma n yūd yaa d sēn na n modg n da kē sam ye.

11 A Eduardo miime tu yē sēn lebg n wa wā, a sā n dat n ges a zakā yell sōma, a segd n zāmsa ligd kēgsgo. Yē ne a pagā gulsā būmb nins sēn yaa tulae

9. Bōe yīng tu ges f zak rāmb yellā pa baood tu f paam ligd wusgo?

10. Bōe yīng tu yaa sōma tu d ra kē sama?

11. Bōe n tōe n sōng zak rāmb tu b kēgs ligdi?

ne-bā, n get rē n bāngd ligd ning b sēn na n yiisā. Yaa vēeneg tu b pa tōe n da būmb wusg wa pīndā ye. La zakā ned kam fāa sakame n pa na n da būmb sēn pa tulae ye.* A Eduardo yiisa a kambā lekoll ning pugē b sēn da be tu yaoobā yaa toogā, n tu kēes lekoll sēn karemd sōma, tu yaoobā yaool n pa wusg ye. Yē ne a zakā rāmb puusa Wēnnaam n kos t'a sōng-a t'a paam tūvmd sēn pa na n kūt tu b bas būmb kēer b sēn da maand a tūudmā pugē ye. Wān to la a Zeova leok b puusgā?

12 Pipi yūvum a yiibā, a Eduardo ra tūmda wusgo, la a pa paamd ligd tu sek a na ra būmb nins sēn yaa tulae ne a zakā rāmbā ye. Ra yaa tulae tu b ri ligd ning a sēn zā n wa wā. Baasgo, b ra tōogd n kēnda tigissā fāa la b naagd taab n moond koēegā. A yāka yam t'a pa na n tol n sak tūvmd sēn na n kūt t'a loog n bas a zakā rāmb ye. La a zāmsa tūm buud toor-toore, sēn na yul n tōogd n paamd tūm wakat fāa.

13 A Eduardo ra tara sama. La a yāka yam n na n yaood bilf-bilfu. Rē kūtame t'a segd n yao n dogl yōod wusgo. La a sēn dat n pa ne a zakā rāmb n sōng-b wa a Zeova sēn datā yīnga, a saka rē ne yamleoogo. A Eduardo yeelame tu ligd ning yē sēn da paamd pīndā yūda yē sēn paamd masā wā naoor piiga. A paasame: “La d pa gōe kom ye. A Zeova nugā ka koēeg ye. D pūd n yāka yam n lebg so-pakdba.” Rē poore, b tēngā yidga bilfu, tu lebg nana ne-a t'a paam būmb nins sēn yaa tulae ne a zakā rāmbā.—Ezai 59:1.

* Ges-y yūvmd 2011 bōn-bwutng kiuugā Réveillez-vous ! wā sōsg ning gom-zug sēn yaa: “Comment gérer votre argent”.

12, 13. Bōe la a Eduardo maan sēn na yul n ges a zakā rāmb yelle, la wān to la a Zeova ning-a barka?



Yāmb tōe n zāmsa tuūm buud toor-toore, n tōog n ges y zakā rāmb yell bū?

(Ges-y sull 12)

Y ROAGDBĀ SĀ N PA WŪMD Y MANESMĀ VÕORE

14 Tēns kēer pūsē, nebā getame tu yaa tulae tu b kō b roagdbā ne b zo-rāmbā ligd la būmb a taaba. A Eduardo yeelame: "Kūun yaa tōnd tēngā neb minungu. D nong n kōta taab kūuni. La m miime tu m pa segd n kō yaar ye." A maaga a yīng n wilg a roagdbā t'a na n sōng-b-la wa a sēn tōe tēka, la tu sēn pak-a n yūd yaa būmb nins sēn yaa tulae ne a zakā rāmbā, la a Zeova tūudmā.

15 Ned sēn paam sor n tōe n kēng tēn-zēng sā n zāgse, a sēn pa rat n bas a zakā rāmb yīnga, tōe n sāama a roagdb kēer sūyā. Ned sēn da be tēn-zēng sā n lebg n wa me, tōe n yū woto. B pūd n tōe n yeelame tu ned a woto pa nong a roagdbā ye. Bōe yīnga? Bala b sēn dat yaa a sēn na n tar ligd n sōngd-ba. (Yel. 19:6, 7) La a Eduardo bi-pugl a Anna yeelame: "Tōnd sā n pa bas a Zeova raabā n bao ligdi, tōe n kūtame tu d roagdb kēer bāng t'a Zeova tūudmā tara yōod wusgo. La d sā n maand

14, 15. Yāmb roagdbā sā n dat tu y lūus ligdā baoob taoore, bōe la y tōe n maane? Y sā n lūus a Zeova raabā taoore, wān to la tōe n sōng-ba?

b sēn data, b na n yū wān n bāng rē?"
—Ges-y 1 Püeer 3:1, 2.

TEEG-Y WĒNNAAM

16 Saam-bi-poak n bas a sūd la a kamb n kēng tēn-zēng n na n tu bao ligdi. A sēn ta be, a yeela kāsem-dāmbā tu sēn na yul tu yē tog sorā, bāmb monga b mens būmb wusgo. A paasame: "Yū tulae tu m sūdā bas a kāsem-sobendā menga. Rē n so tu m saagd ne m sūur fāa t'a Zeova na n ning-m-la barka." D sā n tar tēebo, n yāk Yam tu zems a Zeova raabā, d tōe n kūsa sūd t'a na n ning-d-la barka. La ned sā n yāk Yam tu pa zems ne a raabā, a pa ningd bark ye. Sēn paase, d sā n bas tuūmd a sēn kō-d buum-faad yīnga, pa noom-a ye.
—Karm-y Hebre dāmb 11:6; 1 Zā 5:13-15.

17 Y sā n wa rat n yāk Yam n maan būmb bū y reng n bao a Zeova sor-wilgri, n da wa maand y bāngē ye. Pūus-y-yā-a n kos a vuusem sōngā, Yam la sōngre.

16. a) Wān to la ned tōe n 'belg a meng ne tagsg sēn ka sūda'? (Zak 1:22) **b)** Yam-yākr bug buud la a Zeova ningd barka?

17. Y sā n wa rat n yāk Yam n maan būmbu, bōe yīng tu y segd n deng n bao a Zeova sor-wilgri, la wān to la y tōe n maan dē?

(2 Tūm. 1:7) Sok-y y meng woto: 'Mam na n sak n tū a Zeova baa b sā n wa namsd maam m tēebā yīng bū?' Yaa vēeneg tu y na n leokame tu n-ye. La sā n yaa woto, y pa na n sak a Zeova n kell n pa ne y zakā rāmba, baa rē sā n na n kūt tu y pa paam naa vuum sūda? (Luk 14:33) Kos-y kāsem-dāmbā sōngre, la y tū sagls nins b sēn na n tik Biiblā zug n kō-yā. Y sā n maan woto, y wilgdame tu y kusa sūd t'a Zeova na n sōng-y-la wa a sēn pūlmā. Kāsem-dāmbā pa na n togs yāmb y sēn segd n maaneg ye. La b na n sōng-y lame tu y bāng n yāk yam sēn na n naf-yā.—2 Kor. 1:24.

18 A Zeova wilgame tu yaa zak sobend-dāmbā n segd n ges b zagsā rāmb yell daar fāa. (Gal. 6:5) D saam-biis wūsg kell n paa ne b zagsā rāmb n get b yelle, baa sēn pa nana ne-bā, wall neb a taab sēn dat tu b loogā. D pēgd-b lame, la d pūusda a Zeova b yīnga. D sēn pūusd b yīngā toor sēn ka be, sabab-wēng sā n wa paam d tēed-n-tākāense, wall b lūu bāaga, d tōe n sōng-b lame. (Gal. 6:2; 1 Pte. 3:8) Y tōe n sōnga nin-kāensā buudā tu b paam tūvmd bū? Y tōe n kō-b-la būmb b sēn dat zīg pugē, wala ligd bū ruūb bū? Y sā n sōng-ba, tōe tu b pa na n bas b zakā rāmb n tu bao ligd ye. —Yel. 3:27, 28; 1 Zā 3:17.

RA YĪM-Y T'A ZEOVA YAA YĀMB SŌANGD YE!

19 Biiblā yeela woto: "Bū yāmb da yū ligd-noangdb ye, la bū y kūt tu būmb nins yāmb sēn tarā sek yāmba. Tu bōe, Wēnnaam mengā yeelame yaa: 'Mam kōn bas yāmba, wall m mong yāmb abada ye.' Dē, tōnd tōe n yeela ne daood yaa: 'Zu-soabā yaa mam sōangda, mam kōn zoe rabeem ye. Ned tōe n maana maam

18. Ända n segd n ges zakā rāmb yelle, la bōe la d tōe n maan n sōng?

19, 20. Bōe yīng tu kiris-nebā tōe n kūt sūd t'a Zeova na n sōng-b lame?

bōe?" (Heb. 13:5, 6) Wān to la d tōe n tū sagl-kāngā?

20 Tēng a ye neb wūsg sēn yaa naong rāmb pugē, kāsem-soab n yeel woto: "Nebā wae n yetame t'a Zeova Kaset rāmbā tara sū-noogo. B neeme me tu baa a Zeova Kaset rāmb nins sēn yaa naong rāmbā manegda b mens sōma, tu yaa wa b tara ligd n yūd neb a taabā." Woto wilgdame t'a Zezi sēn pulem neb nins sēn lūusd Rīungā taoorā būmb ningā yaa sūda. (Mat. 6:28-30, 33) Vēenega, y saasē Ba a Zeova nonga yāmba, n dat yāmb ne y kambā neere. Biiblā yeelame: "Zu-soabā nif geta dūniyā zīgā fāa n dat n sōng neb nins sēn dat Wēnnaam ne b sūyā fāa wā." (2 Kib. 16:9) Yaa rē yīng la a sēn kō-d noy d mens nafr yīngā. Wala makre, a kōo noy zakā vuum la būmb nins sēn yaa tūlaeyā baoob weengē. D sā n tūud no-kāense, d wilgda a Zeova tu d kūs-a-la sūda, la tu d nong-a lame. Bala, "Wēnnaam nonglem yaa tu tōnd sak bāmb tōogo. La bāmb tōog ka toog ye."—1 Zā 5:3.

21 A Eduardo yeelame tu yē miime tu yūum nins yē sēn da pa be ne a pagā la a kambā sasa, a kōngā būmb wūsgo. La a pa basd tu rē sāam a sūur tu loog noor ye. A paasa woto: "Neb nins mam sēn da tūmd ne wā wūsg lebga arzegs rāmbā, la b pa tar sū-noog ye. B zagsā pida ne zu-loeese. La tōnd zakā rāmb tara sū-noog wūsgo! Sēn paase, mam sā n get tēn-kāngā saam-biis a taab sēn lūusd Wēnnaam raabā taoor baa b sēn yaa naong rāmbā, noom-m lame. D fāa neeme t'a Zezi sēn pulem būmb ningā yaa sūda."

—Karm-y Matue 6:33.

22 Tall-y raoodo! Sak-y-yā a Zeova la y kūs-a sūda. Y sā n nong a Zeova, y pagā la y kambā, na n sōng-y lame tu y zā y zakā sōma wa Biiblā sēn wilgā. Woto, y na n bāngame t'a Zeova yaa yāmb sōangda.

21, 22. Bōe yīng tu y teeg a Zeova?



Yāmb sūur nooma ne a Zeova sēn get tōndā bū?

*"Zu-soabā nee zīigā fāa. Bāmb nee nin-wēnsā
ne nin-sōma wā fāa." –YEL. 15:3.*

TĒNS wusg pusē, b ningda kamera-rāmb butik-bēdē wā, n get butikā teed la neb nins sēn kēed be wā. Kamera-rāmbā rukda būmb ning fāa sēn maand butikā pugē. Woto, wagdr sā n dūk būmbu, b tōe n gesa be n yōk-a. Kamera kāens maasem yīnga, yaa toog ne wagda wā tu b ruk būmb n loog tu b pa yōk-b ye.

² La woto tēegda tōnd Biiblā sēn yeel būmb ning d Ba a Zeova zugā. A yeelame t'a Zeova "nee zīigā fāa." (Yel. 15:3) La woto rat n yeelame t'a gūusd n geta būmb nins fāa d sēn maandā, n dat n tu d sā n kūs a noyā bū a bāng bū? A gūusdame tu d sā n kūs-a bū a subg-d bū? (Zer. 16:17; Heb. 4:13) Ayo! A Zeova sēn get tōndā yaa a sēn nong tōnd ned kam fāa n dat d neerā yīnga.—1 P̄e. 3:12.

³ Bōe n tōe n sōng tōnd tu d kūs sūd tu Wēnnaam sēn get tōndā yaa a sēn nong-d yīnga? D na n goma

^{1, 2.} Wān to la a Zeova sēn get tōndā yaa toor ne b sēn maand to-to ne kamera-rāmbā?

^{3.} Bōe yell la d na n gome?

**BAO-Y SOGS-KĀENSĀ
LEOORE**

Bōe yīng t'a Zeova get tōndo?

Wān to la a Zeova sagend
tōndo, n kibind-d la a wilgd-d
sore?

Bōe n tōe n kūt t'a Zeova bas
tu zu-loeeg namsd tōndo?

būmb a nu yelle. 1) A Zeova sā n yā tu d rat n maana wēnga, a keoogd-d lame. 2) D sā n maan wēnga, a kibind-d lame. 3) A tūnugda ne Biiblā sagls n wilgd-d sore. 4) A sōngd-d-la zu-loees sasa. 5) D sā n maan tūrga, a ning-d-la barka.

A ZEOVA KEOOGD-D LAME

4 Bu d reng n bao n bāng a Zeova sēn keoogd-d to-to a sā n wa yā tu d rat n maana wēnga. (1 Kib. 28:9) Ad makre. A Kayē sēn wa n kō a Zeova kūun t'a pa reegā, a Kayē "sūur puugame." (**Karm-y Singr 4:3-7.**) A Zeova sagl-a lame t'a bas a sū-yikrā, la a "maan neere." A keoog-a lame t'a sā n ka maan neere, 'kongr wūga a rignoorē n dat n paam-a,' la t'a ra bas tu kongrā paam-a ye. A Zeova ra ratame t'a Kayē sak a saglgā t'a ning-a barka. Rē na n kūtame tu b zoodā ra sāam ye.

5 A Zeova maanda woto ne tōnd me. A tōe n yāa būmb ning sēn be d sūurē wā. A mii d tagsa wā la d ratem buud fāa, tu d pa tōe n solg-a baa fūl ye. A nonga tōndo, n dat tu d maan sēn yaa tūrga. La a pa modgd-d ye. Rē n so t'a sā n wa yā tu d rat n maana wēnga, a keoogd-d lame. A tūnugda ne Biiblā n maand rē. D sēn karemd Biiblā daar fāa wā, d mi n wa karma goam kēere, tu sōng-d tu d bas tuls-wēnse. D tōe n wa karma sēb nins siglgā sēn yiisdā, n yā b sēn gomd minim-wēng d sēn tar yelle, la b wilgd d sēn tōe n maan to-to n

4. Bōe yīng t'a Zeova keoog a Kayē?

5. Wān to la a Zeova keoogd tōndo?

bas-a. Sēn paase, tigissā sasa, d fāa paamda sagls sēn zems b wakate.

6 D sēn paamd sagl-kāensā fāa wā wilgdame t'a Zeova nonga tōnd ned kam fāa. Yaa sūd tu b sēn guls Biiblā yaa yūum kobs masā, tu seb nins siglgā sēn yiisdā me yaa neb milyō-rāmb yīnga. Sēn paase, sagls nins d sēn paamd tigissā sasa wā yaa tīgingā neb fāa yīnga. Baasgo, ne bōn-kāensā maasem, a Zeova sagenda tōnd ned kam fāa sēn na yūl n sōng-d tu d maan tūrga. Rēnd d sūd tōe n yeelame t'a Zeova geta d ned kam fāa yelle.

7 Sēn na yūl n du Wēnnaam saglsā nafa, d segd n kūsa sūd t'a rata d neere, la d sak Biiblā sēn yetā, n yiis tagsg ning fāa sēn pa tat a yam d sūurē wā. (**Karm-y Ezai 55:6, 7.**) D sā n tū sagls nins a sēn kōt-dā, d na n gila zu-loees wūsgo. La d sā n wa kūs n maan sēn pa zems yē? D Ba a Zeova na n kell n sōng-d lame bū?

D BA SĒN NONG-DĀ KIBIND-D LAME

8 A Zeova sā n wa kibind tōndo, wilgdame t'a nong-d lame. (**Karm-y Hebre dāmb 12:5, 6.**) Yaa sūd tu d sā n maan būmb tu b sagend-d wall b kibind-du, d sūur pa noom ye. (Heb. 12:11) La ned sā n wa sagend tōndo, yūta sōma tu d bāng būmb ning sēn kūt t'a sagend-dā. A pa maand woto sēn na yūl n yik d sūurā ye. A yāame tu būmb la d maand tu tōe n sāam

6, 7. a) Bōe n wilgd t'a Zeova geta d ned kam fāa yelle? **b)** Bōe la d tōe n maan n du a Zeova saglsā nafa?

8, 9. Ned sā n tik Biiblā zug n kō-d saglse, wān to la wilgd t'a Zeova geta d yelle? Rūk-y makre.

tōnd ne a Zeova zoodā. A modgame n bao sagls Biiblā pugē, la a bao sēk n na n wilg tōnd d sēn tōe n dems yelā to-to. D na n saka a saglsā, bala, b yita a Zeova nengē.

⁹ Ad makr sēn wilgd t'a Zeova tōe n tūnuga ne ninsaal n sagl tōndo. Saam-biig a ye n da minim n get yoobā yel nand t'a bāng sūdā. A sēn wa n bāng sūdā, a basa minim-wēngā, la yoobā yel gesg yamleoog ra ket n tar-a lame. A sēn wa n da portaabl-paalle, a le lūt a minim-wēngā pugē. (Zak 1:14, 15) A ra tara a portaablā n get yoobā yel ēnternetā pugē. Daar a ye, a kō a portaablā kāsem-soab t'a na n bao nimero. La kāsem-soabā sēn wa n tōgd portaablā, sit-rāmb sēn wilgd yoob yel n puki. Kāsem-soabā kōo saam-biigā saglse, t'a kelge. A wa n tōog n basa a minim-wēngā. D sā n soosd n maand yel-wēna, a Zeova neeme. La a sēn pa rat tu d sāam tōnd ne yē zoodā, a kibind-d lame. A sēn maand woto tu wilgdē tu d yell pak-a lame wā pa noom-d sūda?

D SĒN TŪUD BIIBLĀ SAGLSĀ NAFD-D LAME

¹⁰ Yūl-gulsdā yeelame t'a Zeova na n sagla yē. (Yūl 73:24) D sā n wa rat sor-wilgr bū d tēeg a Zeova yelle, n bao n bāng Biiblā sēn yete. Woto, d na n bānga a Zeova sēn get yelā to-to wā, n tōog n tū a saglsā, n kell n tall zood sōma ne-a. La a Zeova saglsā tūub tōe n sōng-d lame me tu d ges d zakā rāmb yelle.—Yel. 3:6.

^{10, 11. a)} D sā n wa rat a Zeova sor-wilgri, bōe la d tōe n maane? b) Wān to la zak a ye rāmb tū a Zeova saglsā tu naf-ba?



D sēn zāmsd Biiblā tu d sūur-kaset yaa sōma wā, sōngdame tu d gind zu-loeese
(Ges-y sull a 6, 7)

¹¹ Wala makre, Filipin saam-biig n da luaas puug n koaada, tu yē ne a zakā rāmb vū be. Yē ne a pagāra tara kamb wūsgo, la b yiibā fāa ra yaa wakat fāa so-pakdba. Daar a ye, puugā soab kō-b-la sebr sēn wilgd t'a na n deega a puugā. Bōe yīnga? Neb n tu kāneg-b ne puugā soabā, n yeel tu b yaa pu-lik rāmba. Saam-biigā ra pa mi yē ne a zakā rāmb sēn na n kēng zīig ning ye. Baasgo, a teega a Zeova, n yeel woto: "A Zeova na n gesa d yelle. Wakat

fāa, a kōt-d-la būmb nins sēn yaa tulae ne-dā." Saam-biigā ne a zakā rāmb tūu Biiblā saglsā, n da ket n waoogd puugā soaba. Baa b sēn da mi tu b kāneg-b lame wā, b pa zab ne-a ye. Rasem a wān poore, puugā soab yeel-b lame tu b tōe n kell n paame. Saam-biigā ne a zakā rāmb manesem sēn yu to-to yel-kāngā pugē wā yu puugā soab noogo, hal t'a kō-b zīig n paase. (**Karm-y 1 Pier 2:12.**) Vēenega, a Zeova tūnugda ne Biiblā n kōt-d saglse, tu sōngd-d zu-loees sasa.

A ZEOVA YAA D ZOA SĒN SŌNGD-D ZU-LOEES SASA

12 D fāa segda zu-loeese, tu zu-loeeg ning mi n yaa wa pa na n tol n sa ye. Tōe n yu bāaga, namsg d tēebā yīnga, wall d zakā rāmb sēn na n kuusd tōnd d tūudmā yīnga. Zu-loeeg sēn tōe n nams-d wusg me yaa tōnd ne tīgingā ned a to sēn na n pa wumd taaba.

13 Wala makre, saam-biig tōe n yeela gomd tu sāam y sūur wusgo. Tōe tu y yeele: 'Ned pa segd n gom a to woto Wēnnaam siglgā pugē ye.' Baasgo, b kōta saam-bi-kāng tūum tīgingā pugē, tu tīgingā neb a taabā pēgd-a. Y tōe n sokda y meng yaa: 'Bōe yīng tu yaa woto? A Zeova neeme bu? A na n sīnd n getame bu?' –Yūl 13:2, 3; Hab. 1:2, 3.

14 Tōe tu pa zaalem la a Zeova sēn sīnd n getē wā ye. Yāmb tōe n

12, 13. Bōe n tōe n wa kūt tu d tags tu Wēnnaam pa ne d namsgā?

14. Saam-biig sā n yeel būmb tu sāam d sūur t'a Zeova sīnd n getē, tōe tu yaa bōe yīnga?

tagsdame tu yaa ned a to wā n tar taale, t'a Zeova sēn ne būmb fāa wā miē tu yāmb me tara taale. Tōe tu gomd ning sēn sāam y sūurā yu saglg sēn zemse, tu y ra segd n tags a zug neere. Wala makre, saam-biig a Karl Klein yeelame tu daar a yembre, yē maana būmb tu saam-biig a Rutherford sagl-a. La rē poor bilfu, saam-biig a Rutherford sega yē, n puus-a sōma, tu yē pa reeg sōma ye. Saam-biig a Rutherford bāngame tu saglgā zab-a lame. Rē n so t'a yeel-a woto: "Gūusi! A Svītāan dat n paama foo." A Karl Klein sēn wa n lebg a Zeova Kaset rāmbā Siglgā taoor lūutb Sull ned a ye, a yeelame tu yē bāngame tu saam-biisā tara sor n na n kō-d saglse, la tu d sā n kisg-b rē yīnga, a Svītāan na n paam-d lame.*

15 D sā n tar zu-loeega, d ratame t'a sa tao-tao. La d segd n talla sū-mare. D rūk makre. Yāmb talla y kamaan n tu tong masīnē n na n were. Nebā sēn yaa wusgā, y pa mi y sēn na n paam y werbā wakat ning ye. Y sā n pa maag y yīnga, n dūk y kamaanā n bao masīn a to, y tōe n ta n mikame tu nebā sōor yūda pipi soabā. La y sā n tall sū-mar n pa pipi masīnē wā, y tōe n paama y werbā tao-tao n yūg y sēn na n bao masīn a to. Woto me, y sā n wa tar zu-loees bu y tall sū-mar n kell n sak Biiblā saglsā, t'a Zeova na n sōng-y lame tu y tōog toogo.

* Saam-biig a Karl Klein kibarā bee yūmd 1985 sig-noy kiuug pipi daar Gūusg Gasgā pugē.

15. D sā n wa tar zu-loeese, bōe la d pa segd n yīmi?

16 A Zeova tōe n basa zu-loeeg t'a namsd tōndo, a sēn dat tu d rūk yam yīnga. (**Karm-y 1 Pīeēr 5:6-10.**) Pa Wēnnaam n wat ne zu-loeesā ye. (Zak 1:13) Zu-loeesā wusg yaa "yāmb bēyā sēn yaa Sūtāanā" n wat ne. La Wēnnaam tōe n tūnuga ne zu-loeeg n sōng tōnd tu d tēebā pāng paase. A nee d namsgā. A sēn nong-dā yīnga, a pa na n bas tu d nams wakat fāa ye. D na n 'namsa wakat bilf' bala. Y sā n wa tar zu-loeese, y sēn mi t'a Zeova geta y yellā, la t'a na n sōng-y lame tu tōog toogā, pa noom-y sūda?—2 Kor. 4:7-9.

A ZEOVA NA N NING-D-LA BARKA

17 A Zeova feesda nebā fāa sūyā, n dat n bāng sēn sūd nong-b yē wā. No-rēes a Hanani yeela rīm a Aza woto: "Zu-soabā nif geta dūniyā ziigā fāa n dat n sōng neb nins sēn dat Wēnnaam ne b sūyā fāa wā." (2 Kib. 16:9) Y sā n kell n maan sēn yaa tūrga, a Zeova na n sōng-y lame.

18 A Zeova rat n ninga tōnd barka. La d sā n dat a barka, d segd n 'basa wēnēga, n maan neere.' (Amos 5:14, 15; 1 Pīe. 3:11, 12) Ned sā n maan tūrga, baa neb a taabā pa ne, a Zeova ningda a soabā barka. (Yūl 34:16) Tēeg-y Israyell pug-roagsdb a Sifra la a Pua kibarā. Israyell nebā sēn wa n yaa yembs Eziptā, a Faraō yeela pug-kāens tu Israyell pag sā n doge, tu biigā yaa bi-ribl bū b kū-a. La b zoeē Wēnnaam n pa maan woto ye.

16. Bōe me n tōe n kūt t'a Zeova bas tu zu-loeeg namsd tōndo?

17. Bōe yīng t'a Zeova feesd nebā fāa sūyā?

18. D sā n maand neere, bōe yīng tu d tōe n kūt sūd t'a Zeova na n keo-d lame? (Ges-y sōsgā sungrē fotā.)

B fāaga kom-peelsā. A Zeova yā a Sifra la a Pua tūum-sōma wā, n kō-b yagense. (Yik. 1:15-17, 20, 21) Woto me, wakat ninga, d tōe n maanda neer tu yaa wa ned baa a ye pa ne ye. La a Zeova neeme, la a na n keo-d lame.—Mat. 6:4, 6; 1 Tūm. 5:25; Heb. 6:10.

19 Otris saam-bi-poak a ye kibar n wilgd tu Wēnnaam nee modgr ning d sēn maand koēegā mooneg pugē wā. A yaa Hōngri ned sēn wa n vū be. Rē n so tu b kō-a ned sēn gomd Hōngri buud-gomdā adērēse. Saam-bi-poakā yūl tao-tao n kēng nin-kāng zakē wā, la a pa yā ned ye. A kēngame n yulme. Wakat ninga, a neeme tu yaa wa ned n be roogē wā, la a soabā pa yit ye. A basa sēba, lēta, la a mengā telefōn nimo. A kell n maana woto yūvmd la pūl-sūka, tu ned yaool n na n pak kūlengā. Yū pag n pake, n pūvus-a noog-noogo, la a paas woto: "Kē-y-yā. Mam karmā sēb nins fāa yāmb sēn basā, n da gūud yāmba." Pagā wilgame t'a ra lūl bāaga, tu tūt nins b sēn kōt-a wā kūt t'a pa rat n sōs ne ned ye. A saka Biibl zāmsgo. Yaa vēneg tu Wēnnaam ninga saam-bi-poakā modgrā barka.

20 A Zeova nee būmb nins fāa d sēn maandā, la a na n keo-d lame. La d miime t'a pa gūusd n dat tu d sā n kūt a noyā bū a sībg-d ye. Woto kūtame tu d maneg n nong-a, bala, d miime t'a geta d yelle, la t'a sūd rat n sōng-d lame.

19. Bōe n kūt tu saam-bi-poak maneg n kūt t'a Zeova nee d tūum-sōma wā?

20. Y sēn mi t'a Zeova nee būmb nins fāa d sēn maandā, y tagsg yaa wāna?

Bōe la a Zezi na n maan n kō-d ka la bilfu?

Yuomd 33 soabā pugē, a Zezi kiime, tu Wēnnaam vuug-a t'a leb saasē. Kaoosg zugē, Wēnnaam kō-a-la tōog t'a lebg rīma, n na n wa ru naam. (Daniell 7:13, 14) Ka la bilfu, a na n menesa naongā dūniyā gill zug la a kut tu laafu zīndi.

—Karm-y Yūl Sōamyā 72:7, 8, 13.

A Zezi naamā wakate, a na n maana bōn-sōma wosg n kō ādem-biisā. A na n talla tōog ning a Ba wā sēn kō-a wā n kut tu d paam d mens ne yel-wēnā, n zems zānga. D na n vuumda tēngā zug ne sū-noogo. Sēn paase, d pa na n le kōol wall d ki ye.

—Karm-y Zā 5:26-29; 1 Korēnt dāmb 15:25, 26.

Bōe la a Zezi maand rūndā-rūndā?


Yaa a Zezi n lōlt kiris-neb hakukā taoor tu b moond koegā dūniyā gill zugu. B kaagda nebā n taasd-b Wēnnaam Rīungā koeg sēn be Biiblā pugē wā. A Zezi pulma a karen-biisā t'a na n ket n sōngd-b-la b vuumda pugē, n tāag wakat ning Wēnnaam Rīungā sēn na n sāam ādem-biisā goosneema-rāmbā.—Karm-y Matue 24:14; 28:19, 20.

A Zezi tūnugda ne kiris-nebā n sōngd nebā n dat tu b vuumā tall barka. A na n kell n kogla neb nins fāa sēn na n sak-a wā n tāag dūni-kāngā sāoongā, tu b paam n kē dūni-paalgā Wēnnaam sēn pulmā pugē.—Karm-y 2 P̄eeler 3:7, 13; Wilgr 7:17.

Y TŌE N PAAMA SŌS-KĀNGĀ BUUD
N KAREM ĒNTĒRNETĀ PUGĒ



Rīm a Zezi na n menesa
nin-wēnsā fāa tēngā zugu



Y sā n dat n bāng n
paas bu y ges seb-kāngā
sak a 8 wā. A Zeova
Kaset rāmbā n yiis-a.

Y tōe n telesarza
seb-kāngā www.jw.org

